

1 KORÏTO

Merepanika Paoro Iokanatsopatakiti Korïto Auakanimoni

1 ¹Nota Paoro, Xesosi Kristo iokanatakitino. Teoso akiritano iua iokanatakiti nininiua ïkapani, kotxi inirekari iokanatinino kãkitimoni isãkire nisãpiretini ïkapani. Aïtari Sóseni inakori aua notakata uai. ²Niokanatsopata hïtemoni, kãkiti Xesosi sãkire auiãkani Korïto sitatxiti auakanimoni. Kristo Xesosi makatxakakini hïtxaua Teoso ïkapani. Teoso akiritai hïte iua nakitiakori hininiua ïkapani. Apaka niokanatsopata ikini tãpati auakanimoni, aãuïte Xesosi Kristo uãka akiritakanimoni. Ate auïte Xesosi, ninoa auïte apaka itxaua. ³Aïri Teoso, Apiananiri Xesosi Kristo pakini sikari ikinipoko erekari hïtemoni. Ninoa kamaerekaxiniretai hïte.

Paoro Misãkiretari Teoso Korïto Auakani ïkapani

⁴Ätipirika nimisãkiretari Teoso ia atoko: “Peerekai pite, kotxi Xesosi Kristo sikari ikinipoko erekari Korïto auakanimoni. Ikara erekari pite sikakiti. ⁵Peerekai pite, kotxi pite kamaerekatari ninoa auini. Pite oerekana ninoa sãkire atão inini ïkapani. Pite kamaimaroretana. Ininiã ninoa sãkire apiaerekata. Ninoa imarore apiaãpota.” Ia atoko nimisãkiretari Teoso.

⁶Hïtemoni asãpiretakiti Kristo pirena auapeka hãkixinireẽ. Ininiã ïteene hãuikari Kristo sãkire. ⁷Ininiã hiãtapakasaakiri aãuïte Xesosi Kristo kanapiriini, ikini sereti erekari Teoso sikakiti aua hïtemoni iua parïka hïkamini ïkapani. ⁸Hïte isikataparaxiniretiniritika ikanapiriini õti apokako. Ininiã maerekati hïtemoni !uari aãuïte Xesosi Kristo

apokasaaki. ⁹Teoso kamariko ikara hĩtemoni, kotxi ikinika isãkire iaõka ikamako. Iuakara akiritai hĩte, himoianatiniri imi aãũite Xesosi Kristo.

!Homanatakapeua

¹⁰Nitariakori, aãũite Xesosi Kristo posotiireẽ nõtãkikai. Hĩsãkire ãtinoka hĩtxako. !Ninirekari homanatakakiniua. Ninirekari ãtika hĩxinikakiti auini. Ninirekari ãtika hinirekakiti auini. ¹¹Nitariakori, Kroee aapoko auakani sãpiretano hĩtekakarika hinaiatatakakiniua. ¹²Kotxi apanakini hĩte txari: “Paoro sãkirera nota kĩpita.” ãtipekana: “Aporo sãkirera nota kĩpita.” ãtipekana: “Petro sãkirera nota kĩpita.” ãtipekana: “Kristo sãkirera nota kĩpita.” ¹³!Apakata ikara atoko hĩkamini. Kristo !ikaiarikaãka. Kona Paoro ipina aamina ĩpiriãmitakari nopini hĩte ĩkapani. Kona Paoro uãkaã hĩpatxisataãka. ¹⁴Nisãpiretari Teoso ereka inini, kotxi kona notani patxisatai hĩte. Krispo, Kaio pakininanira nipatxisata. Apikomoni !nipatxisatari kãkiti. ¹⁵Ininiã kona kãkiti sãpiretari nipatxisatiniri kãkiti nota uãkaã. ¹⁶Ii. Nimaxinĩkaretari. Nipatxisatari Esitépana, iua aapoko auakani pakini. Apikomoni nipatxisatakini !nixinikaika. ¹⁷Kristo kona iokanatano nipatxisarauatini ĩkapani. Iokanatano Teoso iokanapirena erekari nisãpiretini ĩkapani. !Inirekari kãkiti sãkireẽ, kãkiti imaroreẽ nisãpirenauatini, kotxi kãkiti imarore !isãpiretari Kristo ipinini aamina ĩpiriãmitakari nopini amaerekani imaktxakini ĩkapani.

Teoso Imarore

¹⁸Teoso sãkire mauĩãkani uãkatari !kiĩkiteri kãkiti Kristo ipinini aamina ĩpiriãmitakari nopini sãpiretakani. Atepekana, Kristo ipinini sãpiretiko oerekari Teoso posotiire, kotxi Kristo ipinini maktxakari amaerekani. ¹⁹Teoso sãkire iõkatsopatakori kitxakapirĩka txari: Nixipokariko ĩkorapokoriti kimarorerini imarore.

Nixipokariko kiĩkiterini iĩkite.

Itxa Teoso kitxakapirĩka. ²⁰Ītapari kimaroreri? Ītapari apaiaõkarauatakari? Naniparari kaxinikareri ĩkorapokoritikiri? Teoso oerekapekari ĩkorapokoritikiri imarore miĩkiteti imarore atokotxikana inini. ²¹Paimatireri Teoso, kotxi !auritari ĩkorapokoriti auakani imarotiniri iua ninoaka imaroreẽ. Apanakinimoni Kristo sãkire sãpiretiko !kiĩkiteri, iuaritika Teoso apokaerekatari imaktxakiniri kãkiti maerekani, Kristo sãkire sãpiretiko auikasaakina.

²²Xoteoakori nirekari atamatiniri Teoso takaõtxikare, isãkire auikinina ĩkapani. Krekoakoripekana nirekari imaroretxi apiari imarotini. ²³Iuaritika ate sãpiretari Kristo ipinini ĩpiriãmitakari nopini amaerekani imaktxakini ĩkapani. Xoteoakori !nirekari ikara asãkire auikinina. Krekoakoripekana uãkatari ikara asãkire miĩkiteti sãkire inini. ²⁴Iuaritika Teoso akiritakini aua Xoteoakori, Krekoakori pakini. Ninoamoni Kristo parĩka oerekari Teoso posotiire. Iua parĩka oerekari Teoso imarore. ²⁵Kãkiti uãkatari Teoso imarore !kiĩkiteri, iuaritika axapitiki Teoso imarore apiata. Ikinipoko kãkiti imarore poiãoka. Axapitiki Teoso tapara apiata. Ikinipoko kãkiti tapara poiãoka.

²⁶Nitariakori, Teoso akiritakasaakii, hĩxinikari kãkiti xinikakiti atokokana. Natokopa itxa hĩte iusaaki? Iusaaki !kimarorei. !Kaposotiirei iusaaki. Auĩteti !hĩtxaua iusaaki. Itori hĩte ikara atoko inakani iusaaki. ²⁷Teoso mereeri kãkiti. ĩkorapokoriti auakani uãkatari ninoa kãkiti Teoso mereekini miĩkiteni ininiua. Imereena ninoa, kimaroreni ĩkorapokoriti auakani pẽtauatini ĩkapani. ĩkorapokoriti auakani uãkatari ninoa kãkiti Teoso mereekini iõkapetakani ininiua. Imereena ninoa, katapararini ĩkorapokoriti auakani pẽtauatini ĩkapani. ²⁸Iua mereeri kãkiti. ĩkorapokoriti auakani uãkatana ninoa Teoso mereekini minakani ininiuana. Imereeri apanakini manirekakini. Imereeri kãkiti omanatakoni. Kinirepa Teoso mereeri kãkiti ikara atoko inakani? Teoso oerekari kãkiti, kãkiti uãkatakiti apiari inini na atão. ²⁹Ikara atoko ininiã, kãkiti !liposotari iuikiniua Teoso apisatoõ. ³⁰Teosora txĩkitakaua Xesosi Kristo nakitiakori aniniua. Kristo nakiti aniniãua, aimarotari imaroretxi atão inakari. Kristo txĩkitakaua atão inakari akamini Teoso apakapiniua ĩkapani. Iua txĩkitakaua Teoso nakitiakori aniniua ĩkapani. Iĩkitxirauata ate ĩkapani ipĩkasaaki.

³¹Teoso sãkire iõkatsopatakori txari:

!Apakata piuikiniua. Apakatapitika piuikiniri Apiananiri.

Xesosi Ipinini ĩpiriãmitakari Nopini

2 ¹Nitariakori, napokasaaki hĩtemoni, nisãpiretai Teoso sãpiretakiti. Kona nisãpiretai notaka sãkire nimatire. Iusaaki kona noerekai notaka imarore. Teoso sãkirenoka nisãpiretai hĩte. ²Hĩtekata nauakasaaki, na ninirekari ãti imaroretxi nimarotini. Ninirekari Xesosi Kristonoka nisãpiretinii. Apiata ninirekari nisãpiretinii uua ipinini kãkiti ĩkapani ĩpiriãmitakari nopini. ³Hĩtekata nauakasaaki kona kataparaxinireno. Nikikinanaka nipiãkaruatini xika. ⁴Iusaaki

kona kâkiti imaroreēni nisâkirauata. Kona kâkiti imaroreēni ninirekari hâuikiniiri Teoso iokanapirena nisâpiretakiti iusaaki. Teoso iokanapirena nisâpiretakasaaki, kâkiti imarotari Erekarî Matamatakoti posotiireē nisâkirauata. ⁵Ininiã kona kâkiti imaroreēni hâuikari Teoso iokanapirena. Hâuikari Teoso iokanapirena Teoso posotiireē.

Erekarî Matamatakoti Imarore

⁶Teoso sâkire auiãkani iteene âkixinireē aneëkani imarotari Teoso iokanapirena asâpiretakiti kimatireri inini. Ikara imaroretxi kona îkorapokoriti auakani imaroreni. Kona auîtetxiakori imaroreni ikara imaroretxi. Kotxi ninoa imarore paîtiki !auaika. ⁷Asâpiretari Teoso imarore mitxi kâkiti mimarotakiniti, kotxi Teoso kipatari. Itixi kamiko apisa Teoso nirekaua asâpiretiniri ikara imarore kâkitimoni ate iotximere aâpakapini îkapani. ⁸Auîtetxiakori îkorapokoriti auakani !imarotari ikara Teoso imarore. Ninoa imarotaãkamariko, ininiã !okamarinako Apiananiri kaiotximereri aamina îpiriãmitakari nopini. ⁹Kitxakapirîka Teoso sâkire iøkatsopatakori txari:

Kâkiti oki !atamatapanikari Teoso kamakiti tîkane iua tirketakani îkapani. Kâkiti kenakoki !ikenakotapanikari Teoso kamakiti tîkane iua tirketakani îkapani. Kâkiti !ixinikapanikari Teoso kamakiti tîkane iua tirketakani îkapani.

¹⁰Iuaritika Teoso oerekapekaua Erekarî Matamatakotiã. Ikinipoko imarotakari itxaua Erekarî Matamatakoti. Ikinipoko kipatakori Teoso imarore imarota. ¹¹Kâkiti âkixinirenoka imarotari iuaka ixiniãkiti. Âti !imarotari iua xiniãkiti. Iua atokokanera Erekarî Matamatakotinoka imarotari Teoso xiniãkiti, kotxi Teoso itxaua iua. ¹²Kona ate apakapari âtião matamatakoti îkorapokoritikiri. Ate apakapari Erekarî Matamatakoti, Teoso iokanatakiti atemoni, ininiãkara aposotari aimarotiniri Teoso sikakiti atemoni. Itori isikakiti.

¹³Atemoni isikakiti asâpireta. Kona kâkiti imaroreēni asâpiretari kâkiti. Erekarî Matamatakoti oerekaua asâpirenauatini. Ate atamatari Teoso oerekakiti isâkire iøkatsopatakoriã, eereka âtiãtaã isâkire iøkatsopatakoriã aãtatamari iua oerekakiti, ininiã iusaaki aimarotari atão. Ikara atoko aõerekai hîte. ¹⁴Erekarî Matamatakoti mauakiniti !apakapari Erekarî Matamatakoti oerekakiti, kotxi iuamoni ikara sâkiretxi miikiteti sâkire. !Iposotari imarotiniri Erekarî Matamatakoti sâpiretakiti, kotxi Erekarî Matamatakoti !auari iuamoni. ¹⁵Erekarî Matamatakoti auakasaakiri kâkiti,

iuasaaki iposotari ataerekatiniri imakinika, ininiã kãkiti Erekarĩ Matamatakoti mauakinĩti !iposotari apoĩtiniri iua.

¹⁶Teoso sãkire iõkatsopatakori txari:

Kiripa imarotatari Apiananiri xiniãkiti iua oerekini ĩkapani? Iuaritika Kristo oerekaua iuaka xiniãkiti.

Teoso Nitiriakori Atxaua

3 ¹Nitariakori, hĩte !ikamari ikinipoko Erekarĩ Matamatakoti nireẽkiti. Hĩkamari hĩteka nireẽkiti ĩkorapokoriti auakani kamini atokokana. Ininiãkara nisãkirauata hĩtekata amarinikata nisãkirauatini atoko, kotxi poiãonoka hãuikari Kristo sãkire. ²Tinitxiã atoko inakari nisãkire nisikai. Xinitxi atoko inakari nisãkire kona nisikai, kotxi !himĩteenekari nisãkire kamimari. Uatxapiima hĩte !iposopanika noerekakiti kamimari himarotini. ³ĩkorapokoriti auakani xinikini atoko hĩxinikapanka. Ikara xika hĩxikotakakaua. Hinaiatakakaua. Homanatakakaua. Hĩteka nireẽkiti hĩkama, ĩkorapokoriti auakani kamini atokokana. ⁴Kotxi ãtikaka hĩte txari: “Paoro sãkire nikĩpita.” Apanakini txari: “Aporo sãkire nikĩpita.” Ikara atoko hininiã, kãkiti ĩkorapokoritikini sãkire atoko hĩsãkirauata. !Kiĩkitepanikai.

⁵Kiripa Paoro? Kiripa Aporo? Kristo nitiriakorinoka atxaua. Iua sãkire sãpiretakaninoka atxaua. Hĩte auikapekari Kristo sãkire asãpiretakasaakii. Apiananiri sikari parĩkatxi ikininapemoni akamini ĩkapani. ⁶Ia atoko itxa parĩkatxi Teoso sikakiti: Merepanika nota sãpiretari Teoso sãkire kãkitimoni, takariki nitakini atokokana. Eereka Aporo oerekari ninoã kãkiti apikomoni Teoso sãkire. Āparaã takari nireẽkiti atoko itxa apikomoni Teoso sãkire isãpiretakiti. Nota, Aporo pakini parĩkauata ikara atoko, iuaritika Teosonoka aneẽkakari takari. Iuanokara txĩkitakari kãkiti auikiniri isãkire. ⁷Takariki taãkari, āparaã siãkari pakini minakati ninoã, kotxi Teosonoka aneẽkakari takari. ⁸Teoso sãkire merepanika sãpiretakari nirekari iparĩkauatini Teoso ĩkapani. Teoso sãkire apikomoni sãpiretakari apaka nirekari iparĩkauatini Teoso ĩkapani. Ininiã Teoso sikariko ninoã parĩka ĩki ninoamoni iparĩkana iaõka. ⁹Teosokata parĩkauatakani atxaua. Teoso kikiote atoko hĩtxaua. Apaka Teoso aapoko atoko hĩtxaua.

¹⁰Teoso sikapekano ikinipoko erekari niparĩka iua ĩkapani nikamini. Aapokotxi kamiko apisa aapokotxi kamakari kimaroreri takari kaikori, inopini aapokotxi ikamini ĩkapani. Iua aapokotxi kamakari kimaroreri atoko nitxaua. Merepanika nota parĩkauata Kristo sãkire nisãpiretini.

Kaikori aapokotxi kamakari takakiti atoko itxa ikara iua sãkire. Eereka apanakini oerekarauata apikomoni. Ninoa parĩka aapokotxi kamiko kaikori nopini atokokana itxa. Erepaniko akamakasaakiri ikara parĩkatxi. ¹¹ Kaikori, aapokotxi kamakari takakiti atoko itxa Xesosi Kristo sãkire. Āti kaikori kãkiti sãkire !auari. Auape kaikori Xesosi Kristo sãkire, kotxi kataparari. ¹² Xesosi Kristo sãkire aãuikasaaki, kaikori aãuini ĩkapani iposope. Aapokotxi iua kaikori nopini atoko itxa aparĩka. Aparĩka atxiĩti oro atoko itxa. Atxiĩti pirata atoko itxa. Atxiĩti kai erekari atoko itxa. Atxiĩti aamina atoko itxa. Atxiĩti aãtsopa atoko itxa. Atxiĩti katsotati atoko itxa aparĩka.

¹³ Itixi xipokini õti kãkiti imarotariko natokopa itxa iparĩka, kotxi iuasaakiko arikatxi ataerekatari iparĩka. ¹⁴ Iparĩka marikakaniã, apakapari iparĩka ĩki. ¹⁵ Iparĩka arikiniã, !apakapari iparĩka ĩki. Iuaritika Teoso auiritari iua auini ātipirika Teosokata, txamari iua xipokaarita.

¹⁶ Kona hĩte imarotapanikari Teoso misãkiretiko aikoti hininiua? Kona hĩte imarotapanikari Erekari Matamatakoti auini hiĩto āki? ¹⁷ Kãkiti xipokiniãri Teoso misãkiretiko aikoti, Teoso xipokariko iua. Teoso misãkiretiko aikoti iua nakiti. Hĩtera Teoso misãkiretiko aikoti hĩtxaua.

¹⁸ Kona hĩteka misirienetapeuako. Atxiĩti ātikaka kãkiti hĩte sauaki uãkatari kimaroreni ininiua, kotxi imarotarina ĩkorapokoriti auakani imarore. ĩkorapokoriti auakani uãkatari Kristo sãkire auiãkari miĩkiteti ininiua. Ininiã erekape kãkiti ĩkorapokoriti auakani akiritinii miĩkiteti hininiua, kotxi iuasaaki kimaroreri atão inakari hĩtxaua. ¹⁹ Teosomoni !kiĩkiteri ĩkorapokoriti auakani imarore. Teoso sãkire iõkatsopatakori txari:

Teoso maĩkari kimarorerini ĩkorapokoriti auakani ninoaka imaroreẽ.

²⁰ Apaka Teoso sãkire iõkatsopatakori txari:

Apiananiri imarotari ĩkorapokoriti kimarorerini imarore !itxapõ.

²¹ Ininiã !apakata kãkiti iuikiniua imarore xika. Ikinika aua hĩtemoni. ²² Paoro aua hĩtemoni. Aporo aua hĩtemoni. Petro aua hĩtemoni. Itixi aua hĩtemoni. Hãuini, hĩpinini apaka aua hĩtemoni. Uatxa auakari, katana auakari apaka aua hĩtemoni. Ikinipoko aua hĩtemoni. ²³ Kotxi hĩte Kristo nakiti hĩtxaua. Kristo, Teoso nakiti itxaua.

Kristo Iokanatakini Kăkitimoni

4 ¹Erekari kăkiti imarotini auĩtetxiakori aminakaniua. Kristo nitiriakori atxaua. Teoso iokanapirena nĩkatakani atxaua. Iua sikari iokanapirena atemoni apanakini asăpiretini ĩkapani. Iua Teoso iokanapirena !imarotaăka mitxi. ²Nitiritxi atăo inakari Ătipirika kamari iauĩte paniătakiti. ³!Nimaăkatari hĩte ataerekatini nota. !Nimaăkatari apanakini ataerekatini apaka. Kona notaka ataerekataua apaka. ⁴Năkixiniiree maerekati !uari, iuaritika nikamapekari maerekati. Apiananirinokara ataerekatano. ⁵Ininiă !hĩsăpiretapiri: “Kona erekari iua parĩka. Peerekari ikara parĩka,” kona hĩtxape Apiananiri apokini apisa. Apiananiri apokini hiătapako. Iua oerekariko ipiămoni iomaătakori. Oerekariko kăkiti nirekakiti Ăkixiniirena iparĩkauatakasaakina. Iuusaaki Teoso txariko kăkiti: “Erekapitikari pikamakiti,” itxa.

⁶Nitariakori, ikara nota pirena, Aporo pirena pakini nisăpiretai atăo inakari himarotini ĩkapani, Ăti apiata himiuiwakani ĩkapani. Ininiă hĩkamariko Teoso săkire iokatsopatakori iaăka, kotxi !apakata kăkiti iteene iuikiniri Ăti, Ătipekana imanirekakani inini. ⁷Pite apiananitakari !uari. Himapakapakinini !uari. Kapakapare hininiă, kinirepa mapakapareni săkirauatini atoko hĩtxa? ⁸Ikinipoko hinireekiti auapeka hĩtemoni atxiĩti? Katiipekai hĩte. Ate eree mauakanisaaki, atxiĩti hĩteka kamari auĩtetxi hininiua. Ninirekari auĩtetxi atăo hininiua, ininiă ate auĩtetxi atxaua hĩtekata. ⁹Īkorasaaki neenamatz xi poka atoko, auĩtetxi kăiatakari kanapiriă isotatonekata. Ninoa mapotăkire kăkiti auĩtetxi maĩkakini minaăka apanakini atamatinina ĩkapani, inapetinina ĩkapani. Eereka okaăkana ninoa kăkiti. Nota xinikari Teoso nirekari ate iua iokanatakini ikara kăkiti maĩkakoni atoko aniniua. Ikinimane amataua. Kăkiti, Teoso nitiriakori iaxitikini apaka amataua apininimoni asini. ¹⁰Hĩtemoni, miĩkiteni ate txaua, Kristo ĩkapani aparĩkauatakasaaki. Hĩtemoni, kimarorei hĩte, Kristo ĩkapani hĩparĩkauatakasaaki. Hĩtemoni, !kaposotiireua ate. Hĩtemoni kaposotiirei hĩte. Hĩte paxitaăka, txamari ate omanataăka. ¹¹Uatxapiima Kristo săkire ate auikini xika anatxita. Aponata. !Kamăkaua. Amisiritaăka. !Kaapokoua. ¹²Iteene aparĩkauata anireekiti aamotini ĩkapani. Kăkiti takasaakiri maerekati atemoni, ate amanaări Teoso erekari ninoamoni itakini ĩkapani. Amisiritikosaaki, iuusaaki amĩteenekari. ¹³Apanakini misăkirepiretakasaakia, erekari ate

apapakapiretana ninoa. Uatxapiima apanakinimoni ĩkorapokoriti txiko atoko atxaua. Kasakari atoko atxaua ninoamoni.

¹⁴Kona niøkatsopata ikara hĩpetauatini ĩkapani. Niøkatsopata ikara nipinitinii ĩkapani monøkori apokini apisa, kotxi namariteni nota tiretakini atoko hĩtxaua. ¹⁵Hĩtemoni tesi mio Teoso sãkire oereekani auaãkamako, iuaritika poião hĩri atoko inakari aua. Notara hĩri atoko nitxapekaua, kotxi hãuikari Teoso iokanapirena erekari noerekasaakii Kristo Xesosi posotiiree. ¹⁶Ininiã nõtãkikai: Nota kamakiti atokotxikana hĩkamako. ¹⁷Ikara ĩkapani niokanataru Tximótxio hĩtemoni. Iua namarite nitiretakiti atoko. Iua kamari Apiananiri paniãtakiti iaõka. Iua txĩkitakai hĩxinikiniri nikamakiti ikiniõtika Kristo posotiiree. Ikini tõpati Kristo sãkire auĩãkani apotiitiniãtaãua, noerekari kãkiti erekari ikamini ikiniõtika, erekari nota kamini atokotxikana.

¹⁸Ãtikaka hĩte iuikaua, kotxi hĩuãkatari nota mapokakani hĩtemoni. ¹⁹Txamari Teoso auiritiniãno, paĩtiki napokako hĩtemoni. Iuasaakiko ĩnĩnerekari nimarotiniri ninoa iuikakaniua sãkire. Napokasaaki eree, nĩnerekari nimarotiniri Teoso posotiire. ²⁰Teoso auĩtetxi ininiãtaãua kona sãkiretxinani aua. Iposotiire apaka aua. ²¹Kĩripa hĩte nireka? Hĩnĩrekataru nĩnoropatinii aĩkee, eree napokasaaki? Hĩnĩrekataru nitiretinii, nĩmatxitakanii, eree napokasaaki?

Maerekati Xesosi Sãkire

Auiãkani Sauaki

5 ¹Isãpiretaãka kãkiti eree kaminiri maerekati ĩtotxi nireekiti ãti kãkitikata. Iua kãkiti maerekani apiari, kotxi iua sirĩka iri ĩtanorokata. Teoso sãkire mauĩãkani kamari maerekati, iuaritika ninoa ĩkamari ikara atoko inakari maerekati, kiki hĩte sauaki auakari kamakiti atoko. Ninoa ĩnĩnerekari isãkiretinirina ikara atoko inakari maerekati. ²Iuaritika hĩte iuikaua. !Hĩmatinaniuata himaerekani xika. Apiaerekata ĩkora iri ĩtanorokata sirĩkakari hĩokanatinu itakanapini. ³Nĩto kona eree aua, iuaritika nixĩnikakiti auapitika eree hĩtekata, ininiã nota eree hĩtekata nauini atokokana, nĩmereepekari iua maerekati kamakari misiritiko. ⁴Aãũte Xesosi Kristo uãkaã hãpotiitakasaakiuu, nota aua hĩtekata nixĩnikakitiã. Iuasaaki himarotakasaakiri Xesosi Kristo posotiire, ⁵hĩsĩkariko iua Satanasimoni iua ĩto ipinini ĩkapani, ixĩnĩre ereka inini Xesosi kanapiriãkasaaki.

⁶!Apakata hĩuikiniua. Himarotari axapiti pã tireẽkari tirekakari itori pã. Iua atokokana ãtika maerekati kamakari txĩkitakari kaiãopokori kãkiti kaminiri maerekati. ⁷Ininiã hõkanapariko maerekati mitxi hĩkamakiti, amaneri hinini ĩkapani. Ininiã pã miãtiãkati atoko hĩtxaua, kotxi ikeke !auari. Kitxakapirĩka kãkiti okari ipira soti auĩte, ininiã Teoso nitiri napaãpotakasaaki ninoa nopini, kona okana ninoa. Kristo, apira soti auĩte atoko itxa. Iua ipina ate mapinakani ĩkapani. ⁸Pãskoã kiiniritisaaki, Teoso !auritari pã ãtikakari nikiko, kotxi maerekati pã tirekakari atoko itxa. Ininiã maõkanapari maerekati mitxi akamakiti. Pã miãtiãkati atoko matxaua, ininiã makamari erekari. Masãkiretari atão inakarínoka. ⁹Niokanatsopatapeka hĩtemoni himapotiitakaniua maerekati kamakanikata, ĩtotxi nireẽkiti kamakanikata. ¹⁰Na nixinikari ĩkorapokoriti maerekati kamakani. Maerekati ĩtotxi nireẽkiti kamakani, kamanarerini, kamisirienererini, kamakori teosonetakani pakini ĩkorapokoriti auakani na nixinikanãta. !Hĩposota hĩtakanapinina ninoa, kotxi auapikana. Hĩpĩkasaakinokara, hĩtakanapana ninoa. ¹¹Uatxa niokanatsopata hĩtemoni, himapotiitakaniua maerekati kamakanikata, “Xesosi sãkire auiãkarirano” inakanikata. ĩtanoro minakotokatika sirĩkakani, kamanarerini, kamakori teosonetakani, ãti misãkirepiretakani, ipoãtakani, kamisirienereri pakini hĩtakanapako. Kona hinipokotape ikara atoko inakanikata.

¹²Kona nota parĩkani Xesosi sãkire mauĩãkani misiritiko nisãpiretini. Hĩte parĩkakara Xesosi sãkire auiãkani misiritiko hĩsãpiretini.

¹³Teosokara sãpiretariko Xesosi sãkire mauĩãkani misiritiko. Hĩte iokanatariko maerekati kamakari hĩte sauaki auakari isini.

Ãti Naiatakasaakiri Ãti

6 ¹Xesosi sãkire auiãkari naiatiniãri ãti Xesosi sãkire auiãkari, !apakata Xesosi sãkire mauĩãkani apisatoõ anikiko. Hanikana ninoa Xesosi sãkire auiãkanimoni maerekati kamakari misiritiko himarotini ĩkapani. ²Kona himarotapanikari Xesosi sãkire auiãkani mereẽriko Xesosi sãkire mauĩãkani misiritiko ãti õti? Hĩkamariko ikara atoko inakari xipokatxi õtisaaki, ininiã hĩposotapitikari uatxa himereiniri kãkiti misiritiko, ãti naiatakasaakiri ãti. ³Atxiĩti hĩte kona imarotapanikari himereiniri Satanasi nitiriakori misiritiko ãti õti? Ininiã hĩposotapitikari himereiniri kãkiti misiritiko ĩkorapokoriti uatxa. ⁴Txamari neenamtxi hĩte sauaki auiniã, hanikatari kãkiti Teoso sãkire auiãkani mapaxitakanimoni? !Apakata, kotxi ninoa !imarotari Teoso

paniätakiti. ⁵Ikara atoko nitxai nikamapëtatiniî ïkapani. Atxiïti kona hïposotatari hâpokiniri kimaroreri hïte sauaki neenamatchi xipokini ïkapani? Atxiïti kona ätika aua? ⁶Txamari äti Xesosi säkire auiäkari anikari äti Xesosi säkire auiäkari Xesosi säkire mauïäkani apisatoô maerekati kamakari misiritiko himarotini ïkapani. Ikara atoko !apakata.

⁷Ininiä iteene hïkerokari, kotxi hanikari hïtari kâkiti misiritiko mereëkarimoni. Erekafe hâuiritiniri hïtari kaminiri maerekati hïtemoni. Erekafe hâuiritiniri hïtari ïtirïkiniri hïtii. ⁸Txamari hïitriuata. Hïkamari maerekati. Hïtariakorimonira hïkamari ikara. !Apakata. ⁹Kona himarotapanikari atâo minakati kamakani !isari Teoso auïtetxi ininiätaãua? Kona hïteka himisorienetapeua. Ia atoko inakari kâkiti !isari Teoso auïtetxi ininiätaãua: maerekati ïtotxi nireëkiti kamakani, kamakori teosonetakani, ïtanoro minakotokatika sirïkakari, kiki sito ininiua nirekakari, kiki äti kikipata sirïkakari. Ninoa !isari Teoso auïtetxi ininiätaãua. ¹⁰Kïtiririni, kamanarerini, poätakani, äti misäkirepiretakani, kamsirienenerini pakini !isari Teoso auïtetxi ininiätaãua. ¹¹Ikara atoko mitxi hïtxaua hïte apanakini. Iuaritika himaerekani makatxakaäkapeka. Teoso kamaï hïte inakitiakori hinini. Apiananiri Xesosi kamaerekatai. Erekarï Matamatakoti, aTeosone nakiti, iua apaka txïkitakai hïte atâo inakari kamakani hininiua.

Maerekati ïtotxi Nireëkiti

¹²Nota posotari ikinipoko nikamini, txamari kona erekari ikinipoko nikamini. Nota posotari ikinipoko nikamini, txamari kona ninirekari nikamakiti niauïte ininiua. ¹³Nipokori kamaäka tikakotxi ïkapani. Tikakotxi nirekari nipokori. Txamari Teoso xipokariko nipokori, tikakotxi pakini. Teoso !inirekari akaminiri maerekati aïto nireëkiti äti kâkiti ïtokata. Apiananiri kamari aïto iua nireëkiti akamini ïkapani. Aïto Apiananiri nakiti.

¹⁴Teoso ôkitikari Apiananiri ipïkani sauaki. Iua atokokana iua ôkitikaua ate iposotiireë.

¹⁵Ininiä !apakata Kristo ïto hïsikini sito kanokareromoni. !Apakata. ¹⁶Kiki sirïkasaaki kanokarerokata, iusaaki ätinoka ïtotxi atoko itxauana ninoa. Teoso säkire iökatsopatakori säpiretaua:

Kiki sirïkini sitokata, ätika ïtotxi atoko itxauana.

¹⁷Kâkiti moianatakasaakiri Apiananiri, ätika xiniretxi atoko itxauana ninoa xinire.

¹⁸ Ātokata hīsirĩkini hinirekasaaki, himitekako. Kona hĩkaikotape iuaã. Apanakini maerekati kãkiti kamakiti !imisiritari hiĩto. Imisiritari hãkixinire. Hĩkamakasaakiri maerekati hiĩto nireẽkiti sitokata, himisiritari hiĩto, hãkixinire pakini. ¹⁹ Kona himarotapanikari hiĩto Erekarĩ Matamatakoti misãkiretiko aikoti atoko ininiua? Hĩte iĩtoãkarari iua. Teoso sikari iua hĩtemoni, ininiã hiĩto kona hĩte nakiti. ²⁰ Teoso iamotapekai hĩte Xesosi ipĩkasaaki, ininiã hiĩto iĩki auapitika. Ininiã uatxa iua nakiti hĩtxaua. Ininiã uatxa hiĩtoã hĩpaxitariko Teoso.

Ītanorouatiko Sãkiretxiti

7 ¹ Uatxa napakapapiretariko mitxi hiĩkatsopatakiti notamoni. !Erekarĩ kiki kaxirotinero sito. ² Txamari inirekasaakiri sitokata isirĩkini, erekarĩ kiki auini iuaka iĩtanorokata. Erekarĩ sito auini oaka õtanirikata. ³ Ininiã erekarĩ kiki sikiniri iĩto iĩtanoromoni. Erekarĩ sito sikiniri oĩto oĩtanirimoni. ⁴ Ītanorotxi iĩto kona oa nakitinanini. Ōtaniri nakiti apaka oĩto. Apaka iĩtaniritxi iĩto kona iua nakitinanini. Ītanoro nakiti apaka iĩto. ⁵ Kona hĩtxape: “Kona ninirekarĩ nisirĩkini pĩtekata,” kona hĩtxape. Hinirekasaakiri nipokori himanikakani Teoso himisãkiretini iĩkapani, atxiĩti iuasaaki !hinirekarĩ hīsirĩkini hĩtanorokata. Hĩtanoro apaka kona nirekarĩ osirĩkini hĩtekata iuasaaki, Teosonoka hĩxinikini iĩkapani. Ininiã ikara atoko hĩkaminiã erekarĩ, txamari paĩtiki eereka iuaĩkana hīsirĩkako hĩtanorokata. Ininiã ikara atoko Satanasĩ kona sikanireõtai maerekati hiĩto nireẽkiti hĩkamini ãto sitokata hīsirĩkini. ⁶ Ikara nota õtãkikai hĩte. Kona nipaniãtai ikara hĩkamini. ⁷ Notamoni erekarĩ nota atoko hinini. Iuaritika ikinimane aua Teoso siãkiti iparĩka kamini iĩkapani. Teoso sikari ãti isikakiti ãtimoni. Ātiã isikakiti isika ãtimoni.

⁸ Uatxa nimisãkiretanako mĩtanirini, mĩtanoroni, tikinitakoni pakini. Erekarĩ himĩtaniriuatakani, himĩtanorouatakani nota atoko hinini. ⁹ Txamari himaposotakaniãri hĩtakanapiniri hiĩto nireẽkiti, erekarĩ hĩtanorouatini, erekarĩ hĩtaniriuatini, kotxi kapatakari atoko itxa hiĩto nireẽkiti.

Hĩkamari Atão Hĩtaniriuatakasaaki

¹⁰ Ia nipaniãtana kãkiti iĩtaniriuatakani: !Apakata sito takanapiniri oĩtaniri. Kona notani paniãtai. Apiananirira paniãtai. ¹¹ Otakanapiniãri oĩtaniri, !apakata iuaĩkana oĩtaniriuatini. Erekarĩ oĩtanirimoni iuaĩkana okanapiriini. Iua atokotxikana !apakata kiki

takanapiniro ĩtanoro. ¹²Nõtãkikari apanakini. Apiananiri paniãtakiti apanakini ĩkapani !uari, ininiã nota õtãkikana ninoa ia atoko: Xesosi sãkire auiãkari auiniã ĩtanoro Xesosi sãkire mauĩãkato, oa nirekiniãri okaikotini iuakata, !apakata iua iokanatiniro oa otakanapiniri iua. ¹³Iua atokotxikana, Xesosi sãkire auiãkaro auiniã õtaniri Xesosi sãkire mauĩãkati, iua nirekiniãri ikaikotini oakata, !apakata otakanapiniri iua. ¹⁴Iuasaaki ĩtaniritxi Xesosi sãkire mauĩãkati apakapari Teoso sãkire ĩtanoro kamakiti ereka atamatakasaaki. Iua atokotxikana, ĩtanorotxi Xesosi sãkire mauĩãkato apakapari Teoso sãkire õtaniri kamakiti ereka oãtamatakasaaki. Imakamakaniãrina ikara atoko, !erekana imiakori. Irĩtxi, inorotxi pakini kaminiãri nõtãkikakiti iaõka, erekana imiakori. ¹⁵Xesosi sãkire mauĩãkati nirekiniãri itakanapiniri ĩtanoro, oa auiritariko isini. Xesosi sãkire mauĩãkato nirekiniãri otakanapiniri õtaniri, iua auiritaroko osini. Ikara atoko ininiã, ninoa sikakapeẽkaika. Ikara atoko ininiã erekari, kotxi Teoso !inirekari anenamauatini ikara xika. ¹⁶Pite ĩtanorotxi, pimarotatari? Atxiĩti pĩtaniri auikari Xesosi sãkire imaerekani makatxakiko ĩkapani, Xesosi sãkire pisãpiretakasaakiri iua. Pite ĩtaniritxi, pimarotatari? Atxiĩti pĩtanoro auikari Xesosi sãkire omaerekani makatxakiko, Xesosi sãkire pisãpiretakasaakiro oa.

Teoso Akiritakasaakiri Kãkiti

¹⁷Ininiã ikininape kamariko iparĩka Teoso sikakiti iuamoni, kotxi Apiananiri akiritaua ikara parĩkatxi akamini. Ikara nipaniãtari ikinimane Teoso mereẽkini apotiitiniãtaãua. ¹⁸Teoso akiritakasaakiri kiki, Teoso takaõtxikare ĩtoã auiniã, !apakata Teoso takaõtxikare makatxakiko. Teoso akiritakasaakiri kiki, Teoso takaõtxikare ĩtoã mauakaniã, !apakata Teoso takaõtxikare ĩtoã takiko. ¹⁹Teoso takaõtxikare hĩtoã auiniã, ikara kona txĩkitakai Teoso anaakori hininiua. Teoso takaõtxikare hĩtoã mauakaniã, ikara apaka kona txĩkitakai Teoso anaakori hininiua. Teoso nireẽkiti iaõka kamiko txĩkitakai Teoso anaakori hininiua. ²⁰Teoso akiritakasaakii, iuasaaki mitxi hĩparĩka hĩkamapanikako. ²¹Teoso akiritakasaakii, nitiritxi amotakori hininiãua, ininiã kona maerekaxinireti hĩtxapeua nitiritxi hininiua xika. Iuaritika hĩauĩte sikakiniãi, ininiã hĩsako. ²²Apiananiri akiritiniãri nitiritxi amotakori, Apiananiri sikakakiti itxaua iua. Apiananiri akiritiniãri nitiritxi minakatiua, Apiananiri nitiri iamotakiti itxaua iua. ²³Xesosi amotakini hĩtxaua, ininiã

iuãkana kãkiti nitiri iamotakoni !hĩtxapeuako. ²⁴Nitariakori, Teoso akiritakasaakii, iusaaki mitxi hĩparĩka hĩkamapanikako.

Mitxitakani, Tikinitakoni Pakini

²⁵Uatxa nõtãkikai hĩte mitxitakani. Apiananiri kona sãpiretano ipaniãtakiti hĩte ĩkapani, iuaritika nisãpiretai nixinikakiti, kotxi Apiananiri amonĩkapekano, ininiã kãkiti posota auikiniri nisãkire. ²⁶Īkorasaaki pamonõkoniri Xesosi sãkire auĩãkanimoni, ininiã notamoni apiaerekata kãkiti mĩtanorouatakani. ²⁷Hĩtanorouatapeka hininiã, kona hĩtakanapapero hĩtanoro. Mĩtanorouatakatipanika hininiã, kona hinitapero hĩtanoro. ²⁸Iuaritika hĩtanorouatiniã, maerekati !hĩkama. Kãkiti ĩtanorouatiniã, apokapitikako ninoa maxikiko. Kona ninirekari ikara atoko hĩte ĩkapani.

²⁹Nitariakori, poião õtinoka aua aparĩkauatini Apiananiri ĩkapani. Ininiã hĩte kĩtanororini parĩkauatako Teoso ĩkapani mĩtanoroni parĩkauatini atokotxikana. ³⁰Txiapatakari parĩkauatako Teoso ĩkapani, kãkiti matxiapatakati parĩkauatini atokokana. Poxokori parĩkauatako mapoxokoniti parĩkauatini atokokana. Tiitxi amotakari parĩkauatako Teoso ĩkapani, tiitxi mauakiniti parĩkauatini atokokana. ³¹Īkorapokoriti tiitxi auakini !ixinikapiriko itiina, kotxi ĩkorapokoriti kãkiti potxitakiti xipokaãpota.

³²Ninirekari erekaxinire hinini. Kiki mĩtanoroti posotari ixinikiniri kanatokopa iparĩkauatini Apiananiri ikamapoxokonitini ĩkapani. ³³Txamari kiki kĩtanorori xinikari parĩkatxi ĩkorapokoritikiri, kotxi inirekari ikamapoxokonitiniro ĩtanoro. ³⁴Mĩtanirito, mitxitakaro pakini nirekari oparĩkauatini Apiananiri ĩkapani, kotxi onirekari oĩto, oxinire pakini osikini iuamoni. Txamari sito kĩtaniriro xinikari parĩkatxi ĩkorapokoriti auakari, kotxi onirekari õtaniri okamapoxokonitini. ³⁵Ikara atoko nisãpiretai hĩte, hĩte ereka hinini ĩkapani. Kona ninirekari nimauiritakanii erekari hãpakapini. Ninirekari atãonoka hĩkamini. Ninirekari hĩparĩkauatini Apiananirinoka ĩkapani.

³⁶Ātokoro iri atxiĩti !auiritapanikaro oa ĩtaniriuatini, txamari oaneẽpeka. Ātokori nirekiniãri itakiniro oa, erekari iua auiritiniri iua. !Ikamari maerekati. Erekar iua auiritinina ninoa ĩtaniriuatini. ³⁷Atxiĩti ātokoro iri ākixinireẽ !inirekaro oa ĩtaniriuatini. Atxiĩti !isikaenetaro oa ātimoni. Iua xinikakiti omĩtaniriuatakani ĩkapani pataparari ininiã, ākixinireẽ imarotiniãri inireẽkiti oa mĩtaniriuatakani, ininiã iua kiki kamari erekari. ³⁸Oa sikakari

oïtaniriuatini îkapani kamari erekari. Iuaritika oa masakakati oïtaniriuatini îkapani kamari apiaerekata.

³⁹Teoso paniâtakiti iôkatsopatakori paniâtaro sito kaikotini oïtanirikata iua auapanika inakasaaki. Iua ipininiâ, apakata oïtaniriuatini onirekakitikata. Txamari Apiananiri sâkire auiâkarikatanoka apakata oïtaniriuatini. ⁴⁰Notamoni oa apia poxokoniuada omïtaniriuatakaniâ iuaïkana. Ikara atoko inakari nôtâkikaro sito, kotxi nimarotari Erekari Matamatakoti Teoso nakiti aua notamoni.

Nipokori Teoso Kamakori Sikiko

8 ¹Uatxa nisâpiretai nipokori sikiko teoso kâkiti kamakitimoni. Amakinika aimarotari ikara. Ikara inakari aimarotapeka ate. Kâkiti imaroretxi auiniâ iuikaua. Apiaerekata kâkiti auini tiraôkitxi, kotxi isikataparatarari kâkiti xinire. ²“Kimaroreno nota” inakari !auari imaroretxi. Kaiâopokori imaroretxi imimarotakiniti aua. ³Iuaritika kâkiti tiretiniâri Teoso, Teoso imarotari iua.

⁴Maxinikari nipokori teoso kamakorimoni sikakori. Aimarotari teoso kâkiti kamakiti !kakamareri. Aimarotari âtika Teoso atâo inakari aua. ⁵Aua kâkiti kamakiti. Kâkiti takauâkatari “teoso” itxaua. Kâkiti takauâkatari teoso iaxiti auakani, îkorapokoriti auakani apaka. Kaiâopokori ikara atoko inakari teosoakori aua. Kaiâopokori ikara atoko inakari auïtetxiakori aua. ⁶Atemoni âtika Teoso aua. Iua aïri iaxitikiri. Iua kamari ikinipoko. Aparïkauata iuanoka îkapani. Âtika aâuïte aua, Xesosi Kristo. Ikini sereti kamakari iua. Iua posotiireë aâuini aua.

⁷Apanakini !imarotapanikari kâkiti kamakiti teoso minakanuia, kotxi mitxi iteene itotarina teoso kâkiti kamakiti. Ininiâ inikasaakirina nipokori teoso kamakorimoni siâkori, iuâkatarina ikara nipokori teoso atâo inakarimoni siâkori. Iuasaaki ninoa uâkatari maerekati ikaminina, kotxi âkixinireëna liteene imarotarina atâo inakari. ⁸Txamari nipokori !itxïkitakaua Teosomoni asini. Ikara nipokori anikini !imisiritaua. Apaka !ikamari ereka anini.

⁹Iuaritika erepaniko. Hinirekiniâri ikara nipokori hinikini, hïxinikariko apanakini Teoso sâkire poiâonoka auiâkani. Ninoa imarotiniâri hïte nikiniri ikara nipokori, ininiâ ninoa apaka nikari, txamari iuasaaki ninoa kamari âkixinirena manirekakiniti. ¹⁰Teoso sâkire poiâonoka auiâkari atamatiniâi Teoso sâkire iteene imarotakari nikiniri nipokori teoso kamakori misâkiretiko

aikotiã, isikataparaxiniretari iua apaka nikiniri nipokori teoso kamakorimoni siãkori. ¹¹Ininiã pimarore xika, atxiiti pitari Teoso sãkire poiãonoka auiaãkari sari imisiritikomoni. Kristo ipina iua ïkapani apaka. ¹²Ikara maerekati hïtarimoni hïkaminiã, hïkarotari ãkixinire. Hïtari ãkixinire hïkarotakasaaki, hïkamari maerekati Kristomoni. ¹³Ininiã nipokori ninikini txïkitakiniãri nitari kaminiri maerekati, itixi auapanika inakasaaki kona ninikaikari iua nipokori, kotxi kona ninirekari nitari kaminiri maerekati.

Teoso Iokanatakini Kãkitimoni

9 ¹Teoso iokanatakiti nitxaua. Ninireẽkiti niposota nikamini. Naõkitapekari Xesosi Kristo aãuïte. Iparïka nikamakasaaki, hïte aukari Apiananiri sãkire. ²Atxiiti apanakini !auikari Teoso iokanatakiti nininiua. Hïtera aukari Teoso iokanatakiti nininiua. Hïtera oerekari Apiananiri iokanatakiti nininiua, kotxi hïte aukari Apiananiri sãkire, nota sãpiretakasaakii hïte.

³Kãkiti mauikakaniãri Teoso iokanatakiti nininiua, napakapiretana ninoa ia atoko: ⁴Apakata atxiiti aãpakapiniri nipokori, iãriã pakini aparïkauatini ïkapani? ⁵Apakata atxiiti ate anikiniro ãtanoro Teoso sãkire auiaãkaro atekata, apanakini Teoso iokanatakini, Apiananiri itariakori, Petro pakini anikinina ninoa ãtanoro atoktxikana? ⁶Atxiiti apakata Panapee, nota pakininoka parïkauatini anikakiti aãpakapini ïkapani?

⁷Sotato sikasaaki ineenamauatini ïkapani, iuaka liamotari anikakitina. Aua atxiiti ova takakari. Ova itakakiti matximakati aua? !Auari. Kona auari kema auïte piratakari ipira tiniã miãtakati.

⁸Ikara nisãkire kona kãkiti sãkirenanini. Iua atoktxikana Teoso sãkire. ⁹Moisesi iõkatsopatapekari Teoso paniãtakiti. Ia atoko itxa:

Kona hiïtxikari kema auïte nama trikopani ikamakasaaki.

Hãuiritariko inikini.

Teoso tiretatarari kema auïte? Itiretapitikari. ¹⁰Apiata isãpiretari ikara kãkiti parïkauatakani ïkapani. Ininiã takarauatakari takarauata, kotxi inirekari ikiena inikini. Kienatxi apakari aparï ikiena, kotxi inirekari ikiena inikini. ¹¹Katakareri takarauatini atokokana, ate takari Teoso sãkire hãkixinireẽ. Katakareri nikari ikiena itakakiti, ininiã atxiiti apakata ate apakapiniri kienatxi hïte sikakiti? Kotxi ate parïkauata hïte ïkapani. ¹²Apakatiniã apanakini apakapiniri iparïkana ïki hïte sikakiti, ininiã apiata apakata ate apakapiniri

ate parĩka ĩki, iuaritika kona aamanaãri hĩsikiniãua ate parĩka ĩki. Amĩteenekari ikinipoko, kotxi !anirekari aiotokakiniri Kristo iokanapirena erekari hĩkenakotini. ¹³Himarotari Teoso misãkiretiko aikoti ãki parĩkauatakani iuaãtaã apakapari ikiena. Teosomoni sikakori takikoãtaã parĩkauatakani apaka apakapari ipixini iuaãtaã siãkori inikinina ĩkapani. ¹⁴Iua atokotxikana Apiananiri paniãtari iua iokanapirena erekari sãpiretakani apaka apakapiniri iparĩkana ĩki.

¹⁵Ikara atãopitikara, iuaritika kona nipaniãtai ikara atoko hĩkamini. Kona niõkatsopataro ikara, niparĩka ĩki notamoni hĩsikini ĩkapani. Niparĩka ĩki namanainii apisa erekape nipinini. Niuikari niparĩkauatini hĩte ĩkapani hĩtxineirote nimapakapakanisaaki. ¹⁶Teoso iokanapirena erekari noereka, iuaritika !apakata niuikiniua, kotxi Teoso sikari ia parĩkatxi notamoni. Nimisiritiko auapitika, Teoso iokanapirena erekari nimasãpiretakaniã. ¹⁷Teoso iokanapirena erekari nisãpiretiniãri kãkiti, nãkixinireẽ iteene ninirekiniãri ikara nikamini, ininiã napakapapitikariko niparĩka ĩki. Nimanirekakaniãri ikara nikamini, iuaritika nikamari, kotxi Teoso sikari ikara parĩkatxi notamoni nikamini ĩkapani. ¹⁸Ia atoko niĩkitxitiko: Teoso iokanapirena erekari nisãpiretakasaaki, kona minakati napakapa. Ikara atoko kamapoxokonitari nãkixinire, kotxi maĩkitika nisãpiretai Teoso sãkire. Teoso iokanapirena erekari sãpiretakari nitxaua, ininiã nipoſotiire auapitika hiĩkitxitinino nota nipaniãtiniãri hĩte, iuaritika !nĩnirekari ikara atoko nikamini nota nireẽkiti napakapini ĩkapani.

Parĩkatxi Ikinimane ĩkapani

¹⁹Nĩnireẽkiti nikama. Kãkiti nitiri iamotakori !nitxaua. Iuaritika notaka nitxĩkitakaua ikinimane nitiri nininiua, Teoso sãkire apikomoni kãkiti auikini ĩkapani. ²⁰Xoteoakori sauaki niparĩkauatakasaaki, Xoteo auini atoko nitxa nota auini. Ikara atoko ininiã, Xoteoakori auikari Xesosi sãkire. Moisesi paniãtakiti iaõka kamakani sauaki nauakasaaki, ninoã auini atokokana nitxa nota auini, kotxi ninirekari Moisesi sãkire auiãkani auikiniri Xesosi sãkire. ²¹Xoteo minakanuia !imarotari Moisesi paniãtakiti. Ininiã ninoãkata nauakasaaki, kona nipaniãtari Moisesi paniãtakiti ikaminina, Xesosi sãkire auikinina ĩkapani. Iuaritika nikamari Teoso paniãtakiti, kotxi iuatxikana Kristo paniãtakiti nikamini. ²²Kãkiti mataparaxinirenikata nauakasaaki, nota apaka kona kataparaxinireno, Xesosi sãkire auikinina ĩkapani. Ikini kãkiti sauaki nauakasaaki, nikamari kãkiti auini atoko nitxa

nota auini, ininiã ikinipoko niposotakiti nikama apanakini maerekani makatxakiko ĩkapani. ²³Ikara atoko nikama Teoso iokanapirena erekari nisãpiretini ĩkapani. Nikamari ikinipoko, Teoso iokanapirena erekari nisãpiretini ĩkapani. Ikara atoko ininiã, nota apaka apakapari Teoso iokanapirena erekari hĩtekata.

Saporiēta Apakapakari

²⁴Himarotari mitekatxi. Kãkiti miteėkani miteka, iuaritika ātinoka apakapari imitekini ĩki. Merepitipanika mitekatxi mapotōkire apokakarínoka apakapari imitekini ĩki. Ininiã miteėkari atoko hĩtxako. Hĩsapitipo. Teoso parĩka hĩkamapitipo hĩparĩka ĩki hãpakapini ĩkapani. ²⁵Ikini miteėkari parĩkauatapitipo ĩto tapara iteene auini ĩkapani. !Auritari ĩto misiritakari. Ikara atoko ikama, saporiēta imitekini ĩki apakapini ĩkapani. Ikara saporiēta kona okanani aua. Oxipokapitikako. Ate parĩkauatapitipo ātião aãpakapakiti aãpakapini ĩkapani. Ikara aãpakapakiti !ixipoka. ²⁶Miteėkari isinimoni mimarotakati atoko !nitxaua. Nimarotari nisinimoni. Nisapitipo mitekatxi mapotōkiremoni. Maxikatiũka !nineenamauata. Na neenamauata nisanōkakata. ²⁷Nitxĩkitakari nĩto ninitiri ininiua, nota nireėkiti ikamini ĩkapani, kotxi nisãpiretapakari ikara apanakinimoni, ininiãkara kona ninirekari nimapakapakani notaka parĩka ĩki.

Kãkiti Isaeokini Aōerekini Pirena

10 ¹Nota nirekari hĩxinikiniri kitxakapirĩka, aãtokiriakorini takanapakasaakiri Exito tixini, ikinika ninoa aua katxiãri patapi. Iua katxiãri oerekana isinimonina. Apaka ikinika ninoa napari potxoari uiniti āki. ²Ninoa sari Moisesikata, ininiã katxiãri patapi auakasaakina, potxoari uiniti patapi auakasaakina, iusaaki ninoa patxisatiko atoko aua iusaaki. ³Ninoa ikinikana nikari xinitxi Teoso iokanatakiti. ⁴Ninoa ikinikana iãtari āparaã Teoso sikakiti. Ninoa iãtari āparaã kai auĩteãkiriã. Kristo iua kai auĩte āparaã potorikiniãtaã atokokana. Iua sari ninoakata. ⁵Txamari Teoso !apokaerekatari kaiãopokori ninoa, ininiã ipinana. Iĩtona iarika āparaã makipakaniãtaã.

⁶Uatxa axinikana ninoa, ininiã aimarotari amanirekakaniri maerekati ninoa nirekiniri atoko. ⁷!Hĩteosonetapiri kãkiti kamakiti, ninoa apanakini teosonetiniri atokokana, kotxi Teoso sãkire iōkatsopatakori txari:

Ninoa topāka inipokotinina ĩkapani, iātinina ĩkapani, eereka ōkitikauana isarauatinina ĩkapani teoso ikamakitina apisatoō. ⁸!Apakata aanokarauatini ninoa apanakini anokarauatini atoko, kotxi āti ōtinokara vītxi tres mio ninoa okaāka ĩkora maerekati xika. ⁹!Apakata aātamakaerekatiniri Kristo ninoa apanakini kitxakapirīka atamakaerekatiniri atoko, kotxi iua xika imini okana ninoa. ¹⁰!Hītsoatape, ninoa apanakini kitxakapirīka tsoatini atokokana, kotxi eereka Teoso nitiri xipokana ninoa.

¹¹Ikara imisiritikona apoka ninoamoni apanakini pinitiko ĩkapani. Ikara imisiritikona iōkatsopataāka ate pinitiko ĩkapani, kotxi itixi mapotōkire ōti apokaāpota. ¹²Hītemoni ereka hinini, ininiā erepaniko, kotxi atxiīti paītiki hīkamari maerekati. ¹³Hīte atamakaerekataāka ikinimane atamakaerekataāka atoktxikana. Iuaritika Teoso ĩtakanapai hīte. Kona iua auiritari hātamakaerekatiko himamīteenekainiti. Iuasaaki oerekai himitekini, ininiā hīposotari himīteenekiniri.

Teoso Kākiti Kamakiti

¹⁴Ininiā nitariakori nota tiretakini, himiteka teoso kākiti kamakiti hītakanapini. ¹⁵Hīte kākiti kimarorerini, ininiā iteene himixinikariko nisākire. ¹⁶Iāriā aātakasaaki, akinika aāpotiitakasaakiua, axinikari Xesosi ipinini. Iuasaaki atxari Teoso: “Erekapitikai, kotxi Xesosi arēka xiketa ate ĩkapani.” Amaxiōpekitakasaakiri komiri, anikasaakiri, aāpitiitakasaakiua, axinikari Kristo ĩto noropatiko ate ĩkapani. ¹⁷Iuasaaki itomaneua ate, iuaritika ātika komiri atokokana atxaua. Ātika ĩtotxi atokokana atxaua, kotxi amakinika anikari ātika komiri. Ikara komiri Kristo ĩto atokokana itxaua.

¹⁸Hīxinikanako kākiti Isaeokini ĩkorapokoritikini. Ninoa sikari Teoso xinitxi. Eereka ninoa nikari ikara xinitxi. Inikasaakirina ikara xinitxi, iuasaaki ninoa oerekari ĩTeosonetinirina iua. ¹⁹Kiripa ninireka nisāpiretinii? Nisāpiretari teoso kākiti kamakiti kona kakamareri. Iua teoso siākori kona itxa. ²⁰Iuaritika erepaniko. Ikara atāo maerekati. Xoteo minakanuia sikakiti teoso kākiti kamakitimoni ninoa sika Satanasi nitiriakorimoni. Kona Teoso atāo inakari isikana isiākitina. Ininiā na ninirekari hīte moianatiniri Satanasi nitiriakori. ²¹Kona hīposotari Apiananiri iākoanaā hiātini, apaka Satanasi nitirini iākoanaā hiātini. Kona hīposotari Apiananiri kiena hinikini, apaka Satanasi nitirini kiena hinikini. ²²Atuako anirekatari akaminiri Teoso naiatinuia? Ate tapara apiata atxiīti?

Xesosi Auiäkani Kamakiti

23Nota posotari ikinipoko ninireëkiti nikamini, txamari kona ikinika erekari nikamini. Ikinipoko ninireëkiti niposotapitika nikamini, txamari kona ikinipoko kamari nãkixinire aneini.

24!Hinitapiriko hïteka nireëkiti hãpakapini. Himoianatariko ãti iua nireëkiti apakapini.

25Hïposotari hinikiniri nipokori amotakoriãtaã auakari. Iuusaaki kona hïpimaãpïri: “Ia nipokori sikaãkapeka teoso kãkiti kamakitimoni?” !hïtxapeko. Kotxi himarotakasaakiri hinikiniri nipokori teoso kãkiti kamakitimoni sikiko, hãkixinire karotaãka atxiïti. 26Teoso sãkire sãpiretaua:

Itixi Apiananiri nakiti itxaua, ikinika itixi auakani pakini. 27Xesosi mauïäkani aiatakasaakii hïte hinipokotini ninoakata, hinirekiniãri hïsa. Hinikariko isikakitina. Kona hïpimaãpïri: “Ia nipokori teoso kãkiti kamakiti sikaãkapeka?” kona hïtxape, hãkixinire himakarotakaniri ïkapani. 28Txamari apanakini kãkiti iuaã sãpiretakasaakii: “Ia nipokori sikaãkapeka teoso kãkiti kamakitimoni,” itxa. Iuusaaki kona hinikapïri, kotxi atxiïti hïkaroxiniretari ikara kãkiti mataparaxinireti, kotxi:

Itixi Apiananiri nakiti itxaua, ikinika itixi auakani pakini. 29Na nitxai: “Kona hinikapïri ikara, hïteka ãkixinire himakarotakani ïkapani,” !nitxai. Nitxai: “!Hinikapïri ikara, ãti kãkiti ãkixinire himakarotakani ïkapani.” Nota ãkixinireë nota nireëkiti nikamini ïkapani erekari. ãti kãkiti ãkixinireë nota nirekakiti nikamini ïkapani !erekari, ininiã iuamoni ikara nikamakasaaki, nikamari maerekati. Kinirepa !apakata nikaminiri nota ãkixinire auiritakiti? 30Napakapakasaakiri nipokori, ininiã iuusaaki nimisãkiretari Teoso erekari isikakiti. Ininiã kinirepa nimisãkirepiretaãka?

31Nisãpiretai hïte. Hinikasaaki, hiatakasaaki, ikinipoko hïkamakasaaki, hïkamariko ikinika Teoso ereka inini imarotiko ïkapani. 32Kona hïtxïkitakapïri, Xoteoakori, Xoteo minakaniua, kãkiti Xesosi sãkire auiäkani pakini kaminiri maerekati.

33Ninirekari ikinimane kãkiti nireëkiti nikamini, ikinika nikamakasaaki. !Ninirekari erekari notanani ïkapani. Ninirekari erekari itomaneri ïkapani, imaerekanina Xesosi makatxakini ïkapani.

Sitoākini Xesosi Sākire Auiākani

11 ¹Hīkamariko nota kamakiti atoko inakari. Kristo kamakiti atoko nota kamini atokotxikana hīkamako. ²Nitariakori, peerekai hīte, kotxi iteene hīxinikano nota. Peerekai hīte, kotxi hīkamapanikari noereēkiti nisāpiretakiti iaōka.

³Ninirekari himarotiniri ia: Kiki auīte Kristo itxaua. Sito auīte kiki itxaua. Kristo auīte Teoso itxaua. ⁴Ininiā kiki ikii māka imamatxakakaniā Teoso imisākiretakasaaki, apaka Teoso sākire oerekasaaki, kona ipaxitari iauīte Kristo.

⁵Sito okii māka mauakaniā Teoso omisākiretakasaaki, apaka Teoso sākire oerekasaaki, kona opaxitari oāuīte oītaniri. Okii māka omatakakaniā, oa kii kixākakori atoko itxa. ⁶Okii māka omanirekakaniā, ininiā okisauakaiākotaākako. Opētauatiniā, okii kixākiko xika, oiāko kisauakiko xika, ininiā iusaaki okii māka otaka. ⁷Kiki misākiretakasaakiri Teoso, kona erekari itakiniri ikii māka, kotxi Teoso atoko itxa iua. Ikamaāka Teoso ereka oerekini īkapani. Sito kamaāka oītaniri ereka oerekini īkapani. ⁸Merepitipanika Teoso kona kamari kiki sito ītoā. Teoso kamaro sito kiki ītoā. ⁹Kiki kona kamaāka sito īkapani. Sito kamaāka kiki īkapani. ¹⁰Ininiā oa takari okii māka. Ikara atoko ininiā, oerekari oauītetiniri oītaniri. Iusaaki Teoso nitiriakori iaxitikini apaka imarotari oauītetiniri oītaniri.

¹¹Kiki, sito pakini Apiananiri sākire auikasaaki, sito nirekari kiki. Kiki nirekaro sito. !Apakata sitonoka auiniā. !Apakata kikinoka auiniā. ¹²Kotxi sito ina kiki ītoā. Eereka ikinipoko kiki iponaniā sito ītoā. Ikara atoko itxapitikama, Teoso kamari ikinipoko. ¹³Hīteka hīxinikapiretari ia: Sito kii māka mauakaniā, iusaaki atāokani Teoso omisākiretini? ¹⁴Kākiti itotakiti oerekaua kiki ītanoiākori pētatico. ¹⁵Sito auiniā oiāko paītanori, oōuikari oiāko, kotxi oiāko sikaāka okii ipatakari īkapani. ¹⁶Kākiti nirekiniāri ineenamauatini iākotxi pirena xika, ininiā kona ate, ikinika Teoso sākire auiākani pakini !auari ikara. Ininiā !apaniātai ikara atoko inakari hīkamini.

Xesosi Ipinini Xinikiko Kiiniriti

¹⁷Uatxa niōkatsopatakitiā kona niuikai, kotxi hāpotiitakasaakiua, apia erekari kona hīkama. Apiata maerekati hīkama. ¹⁸Merepanika nikenakopiretari hāpotiitakasaakiua Teoso misākiretiko aikotiā

hĩtaparakienatakakiniua. Nixinikari ipixini ikara nikenakopiretakiti atão inini. ¹⁹Apanakini oerekakiti atão minakati auapitika hĩte sauaki. Akenakotakasaakiri ninoa oerekakiti, aimarotari Teoso !apokaerekatana ninoa. Iua apokaerekatana iua sãkire atão inakari oerekakani. ²⁰Hãpotiitakasaakiua, kona atão hĩkamari kiiniri, Apiananiri ipinini xinikiko kiiniriti. ²¹Kotxi hinikasaaki, himixirikari hĩkiena apanakini nikiniri apisapanika. Ininiã apanakini natxita, apanakini poãta iuasaaki. ²²Auapitika haãpoko hinikini ĩkapani, hiãtini ĩkapani. Hãpotiitakasaakiua, homanatarari apanakini Xesosi sãkire auĩãkani. Hĩkamapẽtatarari aĩtariakori matiini. Kiripa nitxai hĩte? Atxiĩti hinirekari niuikini? Kona xatiki niuikai hĩte.

²³Apiananiri sãpiretakiti notamoni, iua atokotxikana nisãpiretapekai hĩte. Ia nisãpiretai: ĩkanõka Apiananiri Xesosi mĩkapiritiko õtisaaki, iua kosekari komiri. ²⁴Iuasaaki imisãkiretari Teoso: “Erekapitikari ia komiri pisikakiti atemoni,” itxa. Iposo atoko imaxiõpekarari iua komiri, sika itxari imoianariakorimoni. Itxana: “Apakapa, nika hĩtxako. Ia niĩto okaãka hĩte ĩkapani. Ia komiri hinikasaaki, hĩxinikanoko nota. Hĩxinikari nipinini hĩte ĩkapani,” itxa. ²⁵Ninoa nipokotaka atoko, mitxi komiri ikosekini atokokana, ikosekari iãkoanaxi. Iuasaaki itxana: “Ia iãkoanaxi oerekari Teoso kamapekarari ikamaenetakiti amaneri, kotxi niarẽka xiketa hĩte ĩkapani. Ia iãriã hiãtakasaaki, hĩxinikanoko nota. Hĩxinikariko nipinini hĩte ĩkapani,” itxa Xesosi.

²⁶Ia komiri hinikasaaki, ia iãkoanaxiãkiri hiãtakasaaki, hõerekari Apiananiri ipinini kãkiti ĩkapani. Ikara hõerekiniritika iua ĩkorapokoriti kanapiriãko.

²⁷Maxikatiĩka kãkiti nikiniãri ia komiri, maxikatiĩka iãtiniãri Apiananiri iãkoanaãkiri, ikamari maerekati, kotxi ĩpaxitarari Apiananiri ĩto, iarẽka pakini. ²⁸Ia komiri hinikini apisapanika, ia iãkoanaxiãkiri hiãtini apisapanika, erekari hĩxinikiniri hãkixinireẽ auakari. Maerekati auakasaaki, hamanaãri Teoso imaktxakiniri ĩkapani. Eereka ia komiri hinika, ia iãriã hiãta. ²⁹Maxikatiĩka hinikiniãri, hiãtiniãri, ininiã hĩteka akiritari himisiriritiko apokini, kotxi kona hĩpaxitarari Apiananiri ĩto. ³⁰Ikara xika itomaneri hĩte sauaki iõkapeta. Ikara xika apanakini amianata. Ikara xika apanakini ipĩpeka.

³¹Amaerekani anitiniã, aamanainiãri Teoso makatxakiniri amaerekani, ininiã amisiriritiko kona apoka. ³²Txamari Apiananiri apokiniãri amaerekani, imisiritaua ate uatxa, amaerekani atakanapini ĩkapani, ininiã eereka !imisiritaikaua iua sãkire mauĩãkanikata.

³³Ininiā nitariakori, hāpotiitakasaakiua Xesosi ipinini xinikiko kiiniriti īkapani, hiātapana apanakini. ³⁴Hinatxitiniā, hinipokotako hāapoko. Ininiā hāpotiitakasaakiua !hīkamari maerekati, ininiā Teoso !imisiritai. Apikomoni nōtākikai ereē napokasaaki.

Erekari Matamatakoti Sikakiti Kākitimoni

12 ¹Nitariakori, ninirekari himarotini Erekar Matamatakoti sikakiti. !Apakata himimarotakaniri. ²Mitxi Xesosi sākire mauīākani hinakasaakiua, himisrienaāka, ininiā hāuikari teoso kamakori masākireti teoso atāo inakari ininiua. Ikara himarotape. ³Kākiti sāpiretiniāi hīte: “Maerekati kamakari itxaua Xesosi,” ininiā iusaaki himarotari Erekar Matamatakoti !auari iuamoni. Kākiti sāpiretiniāi hīte: “Apiananiri itxaua Xesosi,” ininiā iusaaki himarotari Erekar Matamatakoti auapitika iuamoni, kotxi ikara iua oerekakiti.

⁴Erekar Matamatakoti siākiti ikini sereti aua, iuaritika Erekar Matamatakoti ātinoka aua. ⁵Ikini sereti parīkatxi Teoso īkapani aua, iuaritika Apiananiri ātinoka aua. ⁶Ikini sereti Teoso kamakiti aua kākiti īkapani, iuaritika Teoso ātinoka aua.

⁷Erekar Matamatakoti iuaka oerekaua kākitimoni, ikinimane ereka inini īkapani. ⁸Iua Erekar Matamatakoti sikari apanakinimoni isākire kīkiterini ininiuana īkapani. Iua Erekar Matamatakoti sikari apanakinimoni isākire kimarorerini ininiuana īkapani. ⁹Iua sikari apanakinimoni Teoso sākire iteene auikinina īkapani. Isikari apanakinimoni amianatakani imakananitinina īkapani. Erekar Matamatakoti ātinoka aua, iuaritika ikini sereti isika kākitimoni. ¹⁰Apanakini isikaposotiireta posotiiretxi ikaminina īkapani. Apanakini isikaimaroreta Teoso sākire isāpiretinina īkapani. Apanakini isikaimaroreta Erekar Matamatakoti sākirauatakasaaki imarotininina īkapani, maerekati matamatakoti sākirauatakasaaki imarotininina īkapani apaka. Apanakini isikaimaroreta ikini sereti kākiti sākire isākiretinina. Apanakini isikaimaroreta ikara sākiretxi mimarotakoti ikenakotakasaakina, isāpiretinirina iua kenakotakani ninoa sākireē ninoa apaka imarotiniiri īkapani. ¹¹Ātinoka Erekar Matamatakoti aua. Iuanokara parīkauata ikara atoko. Isikari ikara isikakiti kākitimoni inireēkiti iaōka.

Kristo İto Pirena

12Kākiti ĩto ātinoka aua, iuaritika aua ikii, ikanoke, iuako, itapike, ikiti, txaāpota. Itori ikara atoko inakari aua ĩtotxiā, iuaritika ātinoka ĩtotxi aua. Iua atokokana itxa Kristo ĩto. Xesosi sākire auiākani Kristo ĩto atoko itxauana. 13Atxiĩti Xoteoakori atxaua. Atxiĩti Xoteo minakaniua atxaua. Atxiĩti nitiritxi amotakoni atxaua. Atxiĩti nitiritxi minakatiua atxaua. Iuaritika ātika ĩtotxi atoko atxaua, kotxi Erekarı Matamatakoti ātinoka inakari apoka atemoni. Iua apotiitaua ātika ĩtotxi atoko anini ĩkapani. Iua aua aākixinireē.

14Kākiti ĩto ātinoka aua, iuaritika aua ikii, ikanoke, iuako, itapike, ikiti, txaāpota. ĩtotxiā kaiāopokori aua. 15Ininiā !apakata kitĩtxi sāpiretiniā: “Uakōtxi !nitxaua, ininiā ĩtotxiā auakari !nitxaua.” Ikara atoko isāpiretiniā, iuaritika ĩtotxiā auakaripitikara kitĩtxi. 16Kenakokitxi sāpiretiniāri: “Okĩtxi !nitxaua, ininiā ĩtotxiā auakari !nitxaua.” Ikara atoko isāpiretiniā, iuaritika ĩtotxiā auakaripitikara kenakokitxi. 17İtotxi okĩtxinoka auiniā, kanatokopa itxa kākiti kenakorauatini? İtotxi kenakokitxinoka auiniā, kanatokopa itxa kākiti imixikarauatini? 18Teoso kamari ikinika ĩtotxiā auakari. Iua inireēkiti iaōka ikaminana ninoa. 19Ātinoka ĩtotxi auakiti auiniā, ĩtotxi !uari. 20İtotxiā auakani itori aua, iuaritika ĩtotxi ātinoka aua.

21Okĩtxi kona posotari isāpiretiniri uakōtxi: “Kona nota nirekai pite.” Apaka kiĩtxi kona posotari isāpiretiniri kitĩtxi: “Kona nota nirekai pite.” 22Kona ikara atoko itxa. Atxiĩti auākatari āti aĩto auakari !itxa, kotxi !kataparari, iuaritika ikara mauakaniā, aĩto !iparıkauata atāo. 23Kākiti tiretari iĩtoā auakari poiāori kākiti atamatakiti. Ipatari apanakini iĩtoā auakari kākiti matamatakani ĩkapani. 24Aĩtoā auakari apiata apotxitakiti aua apaka. Kona apatarı ikara. Apanakini aĩtoā auakari Teoso takari aĩtoā iteene apaxitini ĩkapani. 25Ininiā Teoso kamari ĩtotxi ātinoka inini. İkamari ĩtotxiā auakani itiretakiniuana ĩkapani. Apanakini ĩtotxiā auakari naiatiniāri apanakini ĩtoā auakari, !apakata. 26Āti ĩtotxiā auakari tsiika. Iuasaaki ikinika kākiti ĩto atatsiirauata. Āti ĩtotxiā auakari iuikaāka, ininiā ikinika ĩtotxi auakini poxokoniuata.

27Kristo ĩto atoko hĩtxaua hite. İtotxiā auakani atoko hĩtxaua Kristo ĩtoā. 28Teoso sākire auiākani ĩtotxiā auakani atoko itxauana. İkini sereti parĩkatxi aua ĩtotxi ĩkapani akamini ĩkapani. Merepanika Teoso mereēri iua iokanatakini. Eereka imereēri kākiti Teoso sākire sāpiretakani.

Eereka imereēri kākiti Teoso sākire oereēkani. Eereka imereēri kākiti Teoso posotiire oereēkani, amianatakani makananitakani, kākiti moianatakani, auītetxiakori, kākiti sākire apanakini mimarotakiniti sākiretakani pakini. Teoso takari ikara atoko inakani parīkauatakani iua sākire auiākani imoianatinina īkapani. ²⁹Kona ikinimaneni Teoso iokanatakini txaua. Kona ikinimaneni Teoso sākire sāpiretakani txaua. Kona ikinimaneni Teoso posotiire oereēkani txaua. ³⁰Kona ikinimaneni amianatakani makananitakani txaua. Kona ikinimaneni imarotari isākiretiniri kākiti sākire apanakini mimarotakiniti. Ikinimane liposotari isāpiretiniri ikara sākiretxi iua kenakotakanimoni ninoa sākireē ninoa apaka imarotini īkapani. ³¹Auapitika ikara Erekarī Matamatakoti sikakiti aparīkauatini īkapani. Iuaritika hinirekariko isikakiti apiaerekatakari. Uatxa noerekaiko isikakiti apiaerekatakari.

Tiraōkitxi Pirena

13 ¹Atxiīti nimarotari ikini uāka sākire nisākiretini. Atxiīti nimarotari Teoso nitiriakori iaxitikini sākire nisākiretini, txamari iuasaaki nitiraōkiuatini !auari, ininiā !apakata nimarore. Metao āsokiko ene atoko nitxa. Ipi panera tore āsokiko ene atoko nitxa. ²Atxiīti nimarotari Teoso sākire nisāpiretini. Atxiīti nimarotari ikinipoko apanakini mimarotakiniti. Atxiīti ikinipoko imaroretxi aua notamoni. Atxiīti iteene nauikari Teoso posotiire, ininiā niposotari ōtanoxiratarī nīpaniātini ātiātaā isini. Txamari iuasaaki nitiraōkiuatini !auari, ininiā minakati nitxaua. ³Atxiīti nisikari ikinipoko nitii, nitxineirote pakini matxineirotenimoni. Atxiīti nauiritari niito arikiko. Txamari iuasaaki nitiraōkiuatini !auari, ininiā !apakata.

⁴Pitiraōkiuatakasaaki, piposotari piātapiniri pinirekakiti apokini. Pitiraōkiuatakasaaki, pikamari erekarī ātimoni. Pitiraōkiuatakasaaki, kona pixikotari āti. Pitiraōkiuatakasaaki, kona pisāpiretari apanakini piuikiniri pikamakiti. Pitiraōkiuatakasaaki, !piuikaua. ⁵Pitiraōkiuatakasaaki, kona pitxīkitakari āti pētauatini. Pitiraōkiuatakasaaki, kona pinirekarī piteka nireēkitinani. Pitiraōkiuatakasaaki, !katimari pomanākarauatini. Pitiraōkiuatakasaaki, !pixinikapinikari maerekati apanakini kamakiti pitemoni. ⁶Pitiraōkiuatakasaaki, kona pipoxokoniua āti kamakasaakiri maerekati. Pitiraōkiuatakasaaki, pipoxokoniua atāo inakarī pikenakotakasaaki. ⁷Pitiraōkiuatakasaaki, pimīteenekari ikinipoko. Pitiraōkiuatakasaaki, pauikari kākiti sākire. Pitiraōkiuatakasaaki,

pauikari kãkiti kamaenetakiti ikamini. Pitiraõkiuatakasaaki, !katimari pitakanapiniri piparĩka pikamini. ⁸Tiraõkitxi !ixipoka. Txamari kãkiti sãporetakiti xipokapitikako. Kãkiti sãkiretiniri ãti uãka sãkire xipokapitikako. Kãkiti imarore ereẽkokapitikako. ⁹Kotxi poiãonoka aimarore. Poiãonoka Teoso sãkire aimarota asãpiretini. ¹⁰Ãti õti aimarotari ikinipoko atão inakari. Iuasaaki atão minakati !lauaika. ¹¹Amarini ninakasaakiua, nisãkirauata amarini sãkirauatini atokokana. Iuasaaki nimarotakiti amarini imarotakiti atoko itxa. Nixinikakiti amarini xinikakiti atoko itxa iuasaaki. Txamari kikipe ninakasaakiua, !ninirekaikari amarini atokokana nininiua. ¹²Uatxa aãtamatakiti Teoso oerekakiti !aposota iteene aãtamatini. Åtakaãri katxikoroã atamatakori atoko itxa aãtamatakiti, Teoso oerekakiti. Åti õti Teoso apisatoõ aãpoka. Uatxa poiãonoka nimarota. Åti õti Teoso apisatoõ aãpokasaaki, nimarotari ikinipoko, Teoso imarotinino atokokana.

¹³Ininiã aua ipi ãti pakini erekari aãkixinireẽ auakari. Aua Teoso sãkire auikiko. Aua Teoso kamaenetakiti ikamini auikiko. Aua tiraõkitxi. Ikara tiraõkitxi apiaerekatakari.

Erekari Matamatakoti Siãkiti

14 ¹Ininiã ikiniõtika hĩtiraõkiuatako. Hinirekariko Erekari Matamatakoti siãkiti. Apiata hinirekariko iua sikinii Teoso iokanapirena hĩsãpiretini. ²Kãkiti sãkire mimarotakoti sãkiretakari misãkiretari Teoso. !Misãkiretari kãkiti, kotxi kãkiti !imarotari isãkire. Erekari Matamatakoti posotiireẽ isãpiretari atão inakari Teoso oerekakiti. ³Teoso sãkire sãpiretakaripekana misãkiretari kãkiti. Iua txĩkitakari kãkiti apiata auikiniri Teoso sãkire. Isikataparaxiniretana ninoa. Imĩkapiritari ninoa ãkixinire. ⁴Kãkiti sãkire mimarotakoti sãkiretakari, iua txĩkitakaua apiata auikiniri Teoso sãkire. Teoso sãkire sãpiretakaripekana, txĩkitakari ikinika Xesosi sãkire auiãkani apiata auikinirina Teoso sãkire. ⁵Erekari hĩte hĩkinika sãkiretiniri kãkiti sãkire mimarotakoti. Iuaritika apiaerekata hĩsãpiretiniri Teoso sãkire, kotxi Teoso sãkire sãpiretakari apiari itxaua. Kãkiti sãkire mimarotakoti sãkiretakari poiãori itxaua. Iua sãpiretiniãri isãkire kenakotakani ninoa sãkireẽ ninoa apaka imarotiniri ĩkapani, iuasaaki erekari, kotxi iuasaaki itxĩkitakari Xesosi sãkire auiãkani apiata auikiniri Teoso sãkire. ⁶Hĩtemoni napokasaaki, nisãkiretiniãri kãkiti sãkire mimarotakoti, nitxĩkitakatai hĩte apiata hãuikiniri Teoso sãkire? Konapitini. Ininiã kona itxa. Noerekiniãri Teoso oereẽkiti notamoni,

nisãpiretiniãi Teoso imarore, nisãpiretiniãi Teoso sãkire, noerekiniãi Teoso sãkire atão hãuikini ãkapani, iuasaaki nitxĩkitakai hĩte apiata hãuikiniri Teoso sãkire. ⁷Maxinikari xikari moianatakari atxiĩti viorão, atxiĩti xõkakori pakini. Kãkiti mimatireni kaminiãri ikara, iuasaaki xikari atão inakari limarotaãka. Ienenoka aua.

⁸Ãtipekana noerekai. Trõpetã ene atão ininiã, sotatoakori kenakotakasaakiri, aiamatana ineenamauatini ãkapani. Trõpetã ene na atão ininiã, sotatoakori limarotari neenamãtxi manãpipe inini.

⁹Iua atokokana kãkiti sãkire imarotakiti himãskiretakaniã, kiriãpa ninoa imarotari hĩsãpiretakiti? Ikara atoko hĩsãkirauatiniã, maxikatĩika hĩsãkirauata. ¹⁰Itori uãkati sãkire aua ikini itixiti. Apakata ikinika imarotiko. ¹¹Kãkiti sãkire nimimarotakaniã, ininiã notamoni iua ãti tixinikiri atoko itxa. Apaka iuamoni nota ãti tixinikiri atoko nitxa. ¹²Hĩte iteene nirekari Erekarĩ Matamatakoti siãkiti hãpakapini, ininiã apiata hinirekariko isikinii isikakiti Teoso sãkire auiãkani iua sãkire iteene auikinina ãkapani.

¹³Ikara atoko ininiã, erekari kãkiti sãkire mimarotakoti sãkiretakari amanainiri Teoso isikaimaroretiniri iua sãpiretiniri isãkire kenakotakani ninoa sãkireẽ ninoa apaka imarotiniã ãkapani. ¹⁴Teoso nimisãkiretiniã kãkiti sãkire mimarotakotiã, nixinire misãkiretari Teoso, txamari !nimarotari notaka sãkire. ¹⁵Ininiã kipa atão nikamini? Ia atão: Nimisãkiretari Teoso nixinireẽ. Apaka nimisãkiretari Teoso niĩkiteẽ. Nixikarauata nixinireẽ. Apaka nixikarauata niĩkiteẽ. ¹⁶Kãkiti sãkire mimarotakotiã hĩsãpiretiniãri Teoso ereka inini, kãkiti ereẽ pisãkire mimarotakani sauaki, liposotari “atãopitikara” inini, kotxi !imarotari pisãpiretakiti. ¹⁷Atxiĩti atão hĩsãpiretiniri Teoso ereka inini, txamari iuasaaki kona pitxĩkitakari iua kãkiti apiata auikiniri Teoso sãkire.

¹⁸Peerekari Teoso, kotxi apiata isikaimaroretano nota nimisãkiretiniri iua kãkiti sãkire mimarotakotiã. Poiãonoka hĩte imarotari kãkiti sãkire mimarotakotiã himisãkiretiniri iua. ¹⁹Iuaritika, Xesosi sãkire auiãkanikata nauakasaaki, apiaerekata nisãpiretinina sikonoka sãkiretxi ninoaka sãkireẽ, kotxi apakata ninoa imarotiniã nisãkire. Niposotiniãri siko mio sãkiretxi kãkiti sãkire mimarotakotiã nisãpiretiniri kãkiti, itori nisãkire, iuaritika maxikatĩika nisãkirauata, kotxi kãkiti limarotari.

²⁰Nitariakori, !apakata himarore amarini xãpitikiri imarore atokokana inini. Iuaritika amarini xãpitikiri makamakaniri maerekati ãtimoni, iua atokotxikana amarini xãpitikiri atoko

!híkamapiri maerekati átimoni. Aneêkari imarore atoko itxako híte imarore. ²¹ Teoso sâkire iøkatsopatakori txari:

Niokanatarari áti uâka hîtemoni, híte nimisâkiretini íkapani.

Áti tixinikini sâkireê nimisâkiretai híte. Iuaritika kona hîkîpitari nisâkire,

itxa Apiananiri.

²² Ininiâ Teoso sâkire auiâkari sâkiretiniâri Teoso sâkire mauîákani sâkire, iua mimarotakiniti, Teoso sâkire mauîákani iuasaaki imarotari Teoso posotiire. Teoso sâkire auiâkari sâpiretiniâri Teoso sâkire apanakini Teoso sâkire auiâkanimoni, ninoa iuasaaki imarotari Teoso posotiire. ²³ Teoso sâkire auiâkani apotiitiniâua, ikinimane sâkiretiniâri kâkiti sâkire mimarotakotinani, iuasaaki kâkiti Teoso sâkire poiâopanika imarotakari íroiniâ, Teoso sâkire mauîákati atxiîti íroiniâ, ininiâ iua uâkakai híte mapitxiritakani hininiua.

²⁴ Txamari ikinimane sâpiretiniâri Teoso sâkire iuasaaki, Teoso sâkire mauîákati íroiniâ, kâkiti Teoso sâkire poiâopanika imarotakari íroiniâ, ininiâ iua imarotari maerekati kamakari ininiua. Iuasaaki imarotari imisiritiko auapitika áti ôti. ²⁵ Iuasaaki ikinimane imarotari iua xinikakiti âkixinireê. Ininiâ iuasaaki ikapotoreêkaua Teoso apisatoõ. Itxari: “Atâopitikara Teoso aua híte sauaki,” itxa.

Kâkiti Apotiitakasaakiua

Teoso Apisatoõ

²⁶ Nitariakori, kanatokopa itxa Teoso sâkire auiâkani apotiitakasaakiua? Aâpotiitakasaakiua, akinika aminari xikari Teoso íkapani. Akinika iposope Teoso sâkire aõerekini atâo aimarotini íkapani. Akinika iposope Teoso oerekakiti asâpiretini. Akinika iposope kâkiti sâkire mimarotakoti asâkiretini. Akinika iposope iua sâpiretakiti asâpiretini ikinimane imarotini íkapani. Ikara atoko itxa aâpotiitakasaakiua Teoso apisatoõ. Iuasaaki makamari ikinika, Teoso sâkire Teoso nakitiakori apiata auikini íkapani. ²⁷ Iuasaaki kâkiti sâkiretiniâri kâkiti sâkire mimarotakoti, ipinoka kâkiti kamari ikara atoko inakari, atxiîti ipi áti pakini kamari ikara atoko inakari. !Apakata apikomoni kâkiti sâkiretiniâri kâkiti sâkire mimarotakoti iuasaaki. Áti sâkirauatakasaaki, apanakini kenakotari. Átinoka sâkirauata iuasaaki. Isâkirauataka atoko, áti sâpiretari isâpiretakiti isâkire mimarotakani sâkireê, isâpiretakiti imarotini íkapani. ²⁸ Iuasaaki

isãkire sãpiretakari mauakaniã, !apakata kãkiti sãkire mimarotakoti sãkiretakari sãkirauatini. Erekarĩ ãkixinireẽ isãkirauatini Teosokata.

²⁹Kãkiti apotiitakasaakia Teoso apisatoõ, iusaaki ipi, atxiĩti ipi ãti pakini Teoso sãkire sãpiretakani sãpiretariko Teoso sãkire. Iusaaki apanakini xinikariko iua sãpiretakiti, atão inini imarotini ĩkapani. ³⁰Topãkakari xinikasaakiri apikomoni Teoso oerekakiti, ininiã iusaaki sãkirauatakari iotoka, Teoso oerekakiti topãkakari sãpiretini ĩkapani. ³¹Ikara atoko ininiã ikinimane posotari Teoso sãkire isãpiretinina. Teoso sãkire sãpiretakani ãti sãkirauata, eereka ãti sãkirauata. Ikara atoko itxaãpotana. Ininiã ikinimane oerekaãkako. Ikinimane sikataparaxiniretaãkako. ³²Teoso sãkire sãpiretakani posotari iãtapiniri Teoso oerekakiti isãpiretini ĩkapani. ³³Kotxi Teoso kona potxitari ienenoka auini. !Apakata kaiãopokori sãkirauatini, kotxi apanakini !imarotari ninoa sãpiretakiti. Neenamtxi atoko itxa. Teoso nirekarĩ inakitiakori kamakiti atão inini apotiitakasaakia iua apisatoõ.

³⁴!Apakata sito sãkirauatini hãpotiitakasaakia Teoso apisatoõ. !Auritaãka osãkirauatini iusaaki, kotxi Teoso sãkire iõkatsopatakori paniãtaro sito kaminiri kiki paniãtakiti. ³⁵Ninoa nirekiniãri ipimarauatinina imimarotakinini imarotinina ĩkapani, ininiã ninoa pimaãna ĩtanirina aapokona apokasaakina. Site sãkirauatiniã kãkiti apotiitakasaakia Teoso apisatoõ, kãkiti pẽtauata oa sãkirauatini xika.

³⁶Hĩte kona apokaerekatatari nisãpiretakiti? Atxiĩti hĩte kamari Teoso sãkire? Konapitini. Atxiĩti Teoso sãkire iokanataãka hĩtenanimoni? Konapitini.

³⁷Teoso sãkire sãpiretakani hininiãua, Erekarĩ Matamatakoti siãkiti auiniãi, ininiã iusaaki himarotari ikara nisãkire niõkatsopatakiti Apiananiri paniãtakiti inini. Hĩsãpiretariko hãuikiniri ikara. ³⁸Himamaãkatakaniãri ikara nisãkire, apanakini ĩmaãkatari hĩte sãkire.

³⁹Ininiã nitariakori, iteene hinirekariko Teoso sãkire hĩsãpiretini. Apaka hãuiritariko kãkiti sãkire mimarotakoti sãkiretiko. ⁴⁰Ininiã hĩkamariko ikinika atão hãpotiitakasaakia Teoso apisatoõ, Teoso sãkire ikinimane kenakotini ĩkapani.

Xesosi Õkitikiniua Pirena

15 ¹Nitariakori, uatxa iuaĩkana ninirekarĩ hĩte xinikiniri Teoso iokanapirena erekarĩ hĩtemoni nisãpiretakiti. Hĩte

apakapapekari ikara nisāpiretakiti. Hĩte iteene auikari ikara. ²Ikara Teoso iokanapirena erekari oerekai himaerekani makatxakiko. Ininiā atāo hīxinikariko ikara nisāpiretakiti. Iteene hāuikiniāri Teoso iokanapirena erekari, himaerekani makatxakaāka. Atāo minakati hāuikiniā, ininiā maxikatiĩka hāuikari.

³Nisāpiretapekai mitxi nota apakapakiti, kotxi ia himimarotakaniā lapakata. Ia napakapakiti: Kristo ipina amaerekani imakatxakini ĩkapani. Teoso sākire iōkatsopatakori sāpiretaua ikara. ⁴Eereka ikataāka. Ipi ōti, āti ōtisaaki iuaĩkana ōkitikaua. Teoso sākire iōkatsopatakori sāpiretaua ikara. ⁵Eereka Petro atamataru iua. Eereka ikinika Kristo moianariakori atamataru iua. ⁶Eereka kiētosi aĩtariakori atamataru iua āti ōti apotiitakasaakiuana. Kaiāopanikani ninoauapanika. Ātikaka ipĩpe. ⁷Eereka Txiako atamataru iua. Eereka ikinika Xesosi iokanatakini atamataru iua. ⁸Imapotōkire nota apaka atamataru iua. !Natamataru Xesosi ĩkorapokoriti itĩpokotakasaaki. Eereka iua apoka notamoni.

⁹Xesosi iokanatakiti poiāori nitxaua. Apanakini iua iokanatakini apiata. Mitxi !erekari nikamakiti, kotxi nimisiritana Xesosi sākire auiākani Teoso nakitiakori, iuaritika Xesosi akiritano iua iokanatakiti nininiua. ¹⁰Teoso sikari ikinipoko erekari notamoni, ininiākara iua iokanatakiti kākitimoni nitxaua. Kona maxikatiĩkani isikari ikinipoko erekari notamoni, kotxi iteene niparĩkauata Teoso ĩkapani. Apanakini Xesosi iokanatakini iteene parĩkauata, iuaritika nota parĩkauata apiata. Kona nota posotiireēni niparĩkauata. Ikinipoko erekari Teoso sikakiti notamoni sikaposotiiretano nota niparĩkauatini ĩkapani. ¹¹Atxiĩti nota sāpiretai ikara Kristo sāpiretakiti. Atxiĩti apanakini iua iokanatakini sāpiretai. Ikara Kristo sāpiretakiti ate sāpiretai. Ikara Kristo sāpiretakiti hĩte auika.

Ipĩkani Ōkitikiko Pirena

¹²Ate sāpiretai Kristo iuaĩkana ōkitikiniua. Ininiā kinirepa ātikaka hĩte txari ia? “!Auari ipĩkani iuaĩkana ōkitikiniua,” hĩtxa. ¹³Ipĩkani iuaĩkana ōkitikiniua mauakaniā, ininiā Kristo apaka kona ōkitikaua. ¹⁴Kristo mōkitikakaniāua, ininiā maxikatiĩka asāpiretai iua sākire. Kristo mōkitikakaniāua, maxikatiĩka hāuikari iua sākire. ¹⁵Kristo mōkitikakaniāua, na atāo asāpiretai Teoso kamakiti, kotxi ate sāpiretapekai iua ōkitikiniri Kristo. Ipĩkani iuaĩkana ōkitikiko mauakaniā, Teoso kona ōkitikari Kristo. ¹⁶Kotxi ipĩkani iuaĩkana mōkitikakaniāua, Kristo apaka kona ōkitikaua.

17Kristo iuaĩkana mōkitikakaniāua, maxikatiĩka hāuikari iua sākire, kotxi limakatzakari himaerekani. 18Kristo iuaĩkana mōkitikakaniāua, ipĩkani iua sākire auĩākani pĩpinanaka. 19Xesosi mōkitikakaniāua, iuaritika ikiniōtika ate auikari iua sākire ĩkorapokoriti aāuakasaaki, ininiā miĩkiteni apiarini atxaua ate.

20Ikara na atāo. Uatxa maxinikari atāo inakari. Kristo ipĩkaripeka ōkitikapeēkaika. Iua amātiiri merepitipanika auakari atoko itxa. Iua merepanika ōkitikaua, ininiākara aimarotari apĩkasaaki ate apaka ōkitikaua. 21Āti kiki kamakitiā ipĩkitxi apoka ikinimanemoni. Iua atokokana āti kiki kamakitiā, ipĩkani ōkitikiko apoka. 22Adāo kamakitiā ikinimane ipina. Kristo kamakitiā iua sākire auĩākani auapininiika ātipirika. 23Kākiti ōkitikaāka ia atoko. Kristo mitxi ōkitikaua. Iua merepanika ōkitikakariua. Ikanapiriākasaaki iua nakitiakori ōkitikauako apaka. 24Eereka itixi xipokaāka. Iuasaaki ikinika auĩtetxi maerekati, ikinika kaposotiireri maerekati pakini ixipokako. Eereka ikinika iua nakitiakori isika iri Teosomoni. 25Kristo ikinimane auĩte itxauako. Iuasaaki ixipokari ikinika imokaiakari posotiire, kotxi ikiti patapi itakana ninoa. 26Imokaiakari atoko itxa ipĩkitxi. Imokaiakariakori ixipokasaaki, imapotōkire ixipokari ipĩkitxi. 27Teoso sākire iōkatsopatakori txari:

Teoso takapekari ikinika iua kiti patapi.

Ikara Teoso sākireē “ikinika” aua, iuaritika aimarotari iuaka litakaua Xesosi kiti patapi, kotxi Teosora txĩkitakari Xesosi ikinimane auĩte ininiua. 28Kristo ikinimane auĩte inakasaakiua, iua Teoso ākiri auĩtetariko Teoso, kotxi mitxi Teoso txĩkitakari iua ikinimane auĩte ininiua. Iuasaaki Teosonoka ikinimane auĩte itxaua.

29Ipĩkani mōkitikakaniāua, kinirepa apanakini patxisataāka ipĩkani ōkitikiniua ĩkapani? 30Atepekana, ipĩkani mōkitikakaniāua, kinirepa ikiniōtika amĩteenekari monōkori? 31Nitariakori, nimarotari ipĩkitxi monōkori ikiniōtika. Ikara nisāpiretai, kotxi niuikai hĩte. Niuikari aāuini aāuĩte Kristo Xesosikata. 32Uai Épeso sitatxitiā kākiti ākiti kaneenamari atoko inakani nirekari imaĩkinino nota. Ipĩkani mōkitikakaniāua, kinirepa nimĩteenekari ikara atoko inakari? Ipĩkani mōkitikakaniāua, ininiā atxari:

Manipokota, maiāta, kotxi katana apinako.

33Kona hāuiritapiri āti misirienetini. Kākiti erekari moianatiniāri maerekati kamakani, ninoa txĩkitakari iua maerekati kamakari ininiua. 34Himerekako. Himarotariko atāo inakari hĩkamini ĩkapani.

Maerekati !hĩkamapinikako. Hĩpẽtaurato, kotxi apanakini hĩte limarotari Teoso.

Kākiti Ĩto Őkitikasaakia

³⁵Atxiĩti āti txari: “Kanatokopa itxa kākiti ōkitikiko? Iuasaaki kanatokopa inakaripa iĩto?” itxa. ³⁶!Kĩkiteri kākiti pimarauatini ikara atoko. Takariki, pimatakakaniāri kipatxi āki !ipitxaka. ³⁷Pitakarauatakasaaki, pitakari okinoka, atxiĩti triko, atxiĩti kimi. Takari aneēkari kona pitaka. Kona takariki atokoni itxa takari ipitxakasaaki. Ipitxere ipinimoni. ³⁸Teoso kamari takari pitxere inireēkiti iaōka. Ikini takariki Teoso sikari ipitxere. ³⁹Āti xinitxi kona āti xinitxi atokoni. Aua kākiti xini. Kaxipirini xini ipinimoni itxa. Kotipiriki xini ipinimoni itxa. Ximaki xini ipinimoni itxa.

⁴⁰Aua iaxiti apiko nopinixiti auakani, aua itixi takote auakani apaka. Peereri ikinipoko, iuaritika iaxiti apiko nopinixiti auakani ipinimoni, itixi takote auakani ipinimoni. ⁴¹Peereri atokatxi. Peereri kasiri apaka, txamari kasiri ātiāo. Peereri iōriki apaka, txamari iōriki ātiāo. Apaka āti iōriki āti iōriki atokotxikana !auari.

⁴²Iua atokokana itxa ipĩkani iuaĩkana ōkitikikosaaki. Ĩtotxi ixiti taākori !auaika. Iua ōkitikakori kona ipinaika. ⁴³Ĩtotxi katikosaaki, !erekari. Ĩtotxi iuaĩkana ōkitikikosaaki, peerekari. Ĩtotxi katikosaaki !kataparari. Iuaĩkana ōkitikikosaaki, kataparari. ⁴⁴Aĩto katikosaaki, aĩto itixi auakani ĩto atokotxikana. Aĩto iuaĩkana ōkitikikosaaki ātiāo aĩto. Ĩtotxi ĩkorapokoriti aāuini ĩkapani aua. Apaka aua ĩtotxi ipinimoni, Teoso sikakiti apĩkasaaki. Ikara ĩtotxi lipina. ⁴⁵Teoso sākire iōkatsopatakori txari:

Teoso txĩkitakari kiki merepitipanika auakari Adāo inakori auāki inini.

Adāo imatonōkari auakari, Kristo inakori, txĩkitakari kākiti auāki inini, apaka imapinakani ĩkapani.

⁴⁶Teoso nireēkiti axinikini kona apoka merepanika. Merepanika axinikari ateka nireēkiti, eereka axinikari Teoso nireēkiti. ⁴⁷Kiki merepitipanika auakari kipatxi kamakori itxaua. Āti kiki Apiananiri, Teoso tixinekiri iua. ⁴⁸Ikinimane kākiti itixi auakani, iua Adāo kipatxi kamakori atokokana. Ikinimane kākiti Teoso tixine sikani, Kristo Teoso tixinekiri atokokana. ⁴⁹Aponaniākasaaki, kipatxi kamakori aĩto, Adāo ĩto atokokana itxa aĩto. Iua atokokana Teoso tixinekiri ĩto, Kristo ĩto atokokana itxako aĩto.

⁵⁰Nitariakori, nisãpiretai hĩte, !apakata kãkiti ĩto, iarẽka pakini sini Teoso auĩtetxi ininiãtaãua. Ipinakari kona auapininiika !itxa.
⁵¹Hĩkenakotariko nisãkire. Nisãpiretaiko kãkiti mimarotakiniti mitxi. Kona ikinimaneni ipina. Iuaritika amakinika txĩkitakaãka ipinipo aniniua. ⁵²Iuasaaki imapotõkire trõpetakero xõkaãka. Iuasaaki mẽkokari katimari atoko itxa. Poki katimari matãkaãtini atoko itxa. Amakinika katimaritika txĩkitakaãka ipinipo aniniua. Iua trõpeta xõkikosaaki, iuasaaki ipĩkani õkitikaãka. Kona ipinaikanako. Iuasaaki atxĩkitakaãka ipinipo aniniua. ⁵³Kotxi arakakani txĩkitakaãkako miarakakani ininiua. Ipĩkani txĩkitakaãkako mipĩkani ininiua. ⁵⁴Arakakani txĩkitakikosaaki miarakakani ininiua, apaka ipĩkani txĩkitakikosaaki mipĩkani ininiua, iuasaaki Teoso sãkire iõkatsopatakori apopeka. Ia atoko itxa Teoso sãkire kitxakapirĩka:

Ipĩkitxi xipokaãkako. Auape kãiatakarĩ, ipĩkitxi xipokakarĩ.

⁵⁵Ipĩkitxi tsii !auaika. Maerekani misiritikoãtaã anikakarĩ kona kãiata.

⁵⁶Ipĩkitxi tsii mitxi aua amaerekani xika. Teoso paniãtakiti iõkatsopatakori oerekaua amaerekani. Teoso paniãtakiti iõkatsopatakori mauakaniã, !auari kãkiti misiritiko. Txamari maerekanitxi tapara aua, kotxi Teoso paniãtakiti iõkatsopatakori auapitika. ⁵⁷Erekapitikari Teoso, kotxi aãuĩte Xesosi Kristo txĩkitakaua akãiatini.

⁵⁸Ikara atoko ininiã, nitariakori nota tiretakini, kataparaxinire hĩtxako. Kona hãuiritapiri apanakini txĩkitakinii maerekati hĩkamini. Hĩparĩkauatako ikiniõtika Apiananiri ĩkapani, kotxi himarotari maxikatĩika !hĩparĩkauata iua ĩkapani. Hĩparĩka ĩki hãpakapapitĩkako.

Txineiro Sikiko Xesosi Sãkire Auiãkani ĩkapani

16 ¹Uatxa nisãpiretai txineiro himakatzakini Teoso nakitiakori ĩkapani. Hĩkamariko Karásia tixini auakani nipaniãtini atokotxikana. Nipaniãtana ninoa Teoso misãkiretikoãtaã apotiitakanuia ia atoko: ²Ikini Tomĩko hĩkinika hĩte nĩkatáro txineiro ninoa ĩkapani. Txineiro Teoso siãkiti iaõka, hinĩkatari ipixini ninoa ĩkapani. Ininiã ereẽ napokasaaki apikomoni txineiro kona apotiitaãka. ³Napokasaaki ereẽ, niokanatarĩ kãkiti, txineiro hĩsikakito anikakarĩ Xerosareẽmoni. Hĩsãpiretano hĩokanatsopatakitiã himereẽkini hĩtxineirote anikakarĩ ĩkapani. ⁴Atxiĩti erekari nota sini apaka, ininiã ninoa moianatano nota.

Paoro Paniãtakiti Pirena

⁵Masetónia tixinimoni nisako, eereka napoka hĩtemoni, kotxi nisapitikako Masetóniamoni. ⁶Iuasaaki atxiĩti nikaikota hĩtekata. Atxiĩti nikaikota mitaãsaaki hĩtekata. Ininiã eereka hĩte posotari himoianatinino nota naiamatakasaaki apikoxiti nisini ĩkapani. ⁷Kona ninirekari mapaõtinoka nikaikotini hĩtekata uatxa. Apiananiri auiritiniãno, ninirekari apikomoni nikaikotini hĩtekata. ⁸Txamari nikaikota uai Épeso sitatxiti Pētekósitxi kiiniriti manapi õti. ⁹Kotxi uatxa kaiãopokori kãkiti ĩkorapokoriti auakani nirekari nisãpiretiniri Teoso iokanapirena erekari ninoamoni. Txamari kaiãopokori kãkiti !inirekano.

¹⁰Atxiĩti Tximótxio sari hĩtemoni, ininiã hãpakapariko iua, imapĩkarauatakani ĩkapani hĩte sauaki, kotxi iua parĩkauata Apiananiri ĩkapani nota parĩkauatini atokokana. ¹¹Ininiã kona apakata kãkiti mamaãkatakaniri iua. Ikanapiriãkasaaki notamoni, iuasaaki hĩokanatari iua erekaxinire inini. Niãtapari iua aĩtariakorikata.

¹²Iteene ninirekari aĩtari Aporo apokini hĩtemoni aĩtariakorikata. Txamari uatxa !inirekari isini hĩtemoni, iuaritika iposotakasaaki isapitikako hĩtemoni.

¹³Araõkire hĩtxako. Itene hãuikariko Teoso sãkire. Hĩtaparaxinireritika hãuako. Hĩtapararitika hãuako Teoso ĩkapani. ¹⁴Xesosi tiraõkiã ikinipoko hĩkamako.

¹⁵Hĩte imarotari Esitépana, inirimane pakini. Ninoa Akaia tixini auakani. Iuaãtaã ninoa merepitipanika auikari Xesosi sãkire. Ninoa iteene parĩkauata Teoso nakitiakori ĩkapani. Nitariakori, iteene nipaniãtai hĩte. ¹⁶Hĩkamariko kãkiti ikara atoko inakani paniãtakiti. Hĩkamariko ikinimane amoianari paniãtakiti, atekata parĩkauatakani paniãtakiti. ¹⁷Esitépana, Potonato, Akaiko pakini apokasaaki uai, nipoxokoniuta, kotxi iminarina notamoni mauakati hĩte masikakiniti. ¹⁸Ninoa sikapoxokonitari nãkixinire, hĩte ãkixinire apaka. Erekari ate iuikiniri kãkiti ikara atoko inakani.

¹⁹Teoso misãkiretikoãtaã apotiitakaniua Ásia tixini auakani xinikamanapitai hĩte. Ákira inakori, Pirisira inakoro pakini iteene xinikamanapitai hĩte, kotxi Apiananiri nakiti hĩtxaua. Apaka Xesosi sãkire auĩãkani ninoa aapoko apotiitakaniua xinikamanapitai hĩte. ²⁰Ikinimane aĩtariakori uai auakani

xinikamanapitai hĩte. Haõkitakakasaakiua, himaratakakauako, kotxi Teoso nakitiakori hĩtxaua.

²¹Nota Paoro iõkatsopatari ia nitakapiretanapini niuakoã.

²²Kãkiti matiretakaniãri Apiananiri Xesosi Kristo, maerekati takaãka iua nopini.

“Apiananiri, uai pina atemoni,” atxari Xesosi.

²³Apiananiri Xesosi Kristo sikari ikinipoko erekari hĩtemoni.

²⁴Nitiretai hĩte hĩkinika, kotxi Kristo Xesosi nakitiakori atxaua. Ameẽ.